




關里誌

ル 5  
1581  
6B





八〇五  
1281  
86

關里誌卷之十八

撰述一

歷代碑記

後漢置百戶卒史詔碑

司徒臣維臣允之臣美稽首言魯前相瑛書言  
詔書崇聖道勉六 執孔子作春秋制孝經刪述  
五經演易繫辭經緯天地幽贊神明故特立廟  
褒成侯四時來祠事已卽去廟有禮器無常人  
掌領請置百戶卒史一人典主守廟春秋饗禮  
財出王家錢給大酒酒置湏報謹問太常祠曹掾



馬牟史郭玄辭對故事辟雍禮夫行祠先聖師  
侍祠者孔子子孫太宰太祝令各一人皆備爵  
太常丞監祠河南尹給牛羊豕各一大司農給  
未祠臣愚以為宜如世說言夫子大聖則象乾坤  
為漢制作先世所尊祠用衆牲長吏備爵飲釐  
子孫敬恭明祀傳于罔極可許臣請魯相為孔  
子廟置百戶卒史一人掌領禮器出王家錢給  
大酒直他如故事臣維臣美愚慙誠惶誠恐頓  
首頓首死罪死罪臣稽首以聞制曰可元嘉三  
年三月二十七日壬寅司徒維司空美下魯相

承書員從事下當用者選年四十以上經通一藝  
雜試通利能奉弘先聖之禮為宗所歸者如詔  
書到言永興元年六月甲辰朔十六日辛酉魯  
相平行長史事下守長擅叩頭死罪敢言之磨滅  
不知司徒司空府王詔書為孔子廟置百戶  
卒史一人掌王禮器選年四十以上經通一藝  
雜試能奉弘先聖之禮為宗所歸者平叩頭叩  
頭死罪死罪謹按文書守文學掾魯孔龢師孔  
憲戶曹史孔覽等雜試龢脩春秋嚴氏經通高  
第事親至孝能奉先聖之禮為宗所歸一除龢

補名狀如牒平惶恐叩頭死罪上司空府讚曰  
巍巍大聖赫赫彌章相乙瑛字少卿平原高唐  
人令鮑疊字文公上黨屯留人政教稽古名重  
規矩之君察舉守宅除吏孔子十九世孫麟廉  
請置百戶卒史一人鮑君造作百戶吏舍功垂  
無窮於是始

魯相顏勅復顏氏元官氏繇發碑

惟永壽二年青雲在淵灘霜月之靈皇極之日  
魯相河南京韓君勅遣惟太古華帝皇繇發碑  
元道百王不改孔子近聖爲漢定道自天王以

下至于初學莫不嚮思嘆仰師德顏氏聖舅家  
居魯親里元官聖妃在安樂里聖族之親禮所  
宜異復顏氏元官氏邑中繇發以尊孔心去聖  
歷世禮樂陵遲秦項作亂不遵圖書倍道畔德  
離敗聖興食糧亡于沙丘君於是造立禮器樂  
之音符鍾磬瑟鼓鼙洗觴觚爵俎豆籩脩飾宅  
廟更作二輿朝車威熹寬杼玄汗以注水泅法  
舊不煩備而不奢上合紫臺稽之中和下合聖  
制事得禮儀於是四方士人聞君風耀敬咏其  
德尊其大人之意連彌之思乃共立表石紀傳

德載其文曰

皇統華胥承天畫卦顏育空桑孔制元孝俱祖  
紫宮太乙所授前闔九頭以升言教後制百王  
獲麟木吐制不空作承天之語乾元以來三九  
之載八皇三代至孔乃備聖人不世期五百載  
三陽吐圖二陰出識制作之義以俟知與於穆  
韓君獨見天意復聖之族卓越紀思修造禮樂  
瑚璉器用存古舊宇慤懃宅廟朝車威熹出誠  
造作漆不水解工不爭賈深除玄汙水通流注  
禮器升堂天雨降澍百姓訥和舉國蒙慶神靈

神誠竭敬之報天與厥福永享年壽上極垂祀  
旁及皇代刊石表銘與乾輝耀長期蕩蕩於盛  
復授赫赫罔窮聲垂億載

魯相孔晨奏出玉案穀祀夫子碑

建寧二年三月癸卯朔廿日巳酉魯相臣晨長  
史臣謙頓首死罪上言臣蒙厚恩受任符守得  
在奎婁周孔舊寓不能闡弘德政恢崇一變夙  
夜憂怖累息屏營臣晨頓首頓首死罪死罪臣  
以建寧元年到官行秋享飲酒泮宮畢復禮孔  
子宅拜謁神座仰瞻榑桷俯視几筵靈所憑依

肅肅猶存而無公出酒脯之祠臣卽自以俸錢  
脩上案食醢具以叙小節不敢空謁臣伏念孔  
子乾元所挺西狩獲麟爲漢制作故孝經援神  
契曰玄丘制命帝卯行又尚書考靈曜曰丘生  
蒼際觸期稽度爲志立制故作春秋以明文命  
綴紀撰書脩定禮儀臣以爲素王稽古德亞皇  
代雖有褒貶世享之封四時來祭畢卽歸國臣  
伏見臨辟雍日神夫子以太牢長吏備爵所以  
尊先師重教化也夫封王爲社立稷而祀皆爲  
百姓興利除害以祈豐穰月令祀百辟卿士有  
益於民矧乃孔子玄德煥炳光于上下而本國  
舊居復禮之日闕而不祀誠朝廷聖恩所宜特  
加臣寢息耿耿情所思惟臣輒依社稷出王家  
穀春秋行禮以供禮祀餘靡賜先王執事臣晨  
誠惶誠恐頓首頓首死罪死罪上言太尉司徒  
司空大司農府治所部從事府昔在仲尼斗光  
之精大帝所挺頽母毓靈承弊遭衰黑不代倉  
轍環歷聘嘆鳳不臻自衛反魯養徒三千獲麟  
輟作端門見徵彤黃著紀黃王景王應王爲漢  
制道審可行乃作春秋復演孝經刪定六藝象

與天談釣河適洛却揆未然巍巍蕩蕩與乾比  
崇

魏制命二十一世孫義爲宗聖侯奉家祀碑  
維黃初元年大魏受命胤軒轅之高蹤紹虞氏  
之遐統應曆數以改物揚仁風以作教於是輯  
五瑞班宗彝鈞衡石同度量秩群祀於無文願  
天時以布化旣乃緝熙聖緒昭顯上世追存三  
代之禮兼紹宣尼之後以魯縣百戶命孔子二  
十一世孫議郎孔羨爲宗聖侯以奉孔子之祀  
制詔三公曰昔仲尼負大聖之才懷帝王之器

當衰周之末而無受命之運在魯衛之朝教化  
乎涿泗之上栖栖焉皇皇焉欲拯已以存道貶  
身以救世於是王公終莫能用之乃退考五代  
之禮脩素王之事因魯史而制春秋就太師而  
正雅頌俾千載之後莫不宗其文以作符仰其  
聖以謀咨可謂命世大聖億載之師表者也遭  
天下大亂百祀墮壞舊居之廟毀而不脩褒成  
之後絕而莫繼闕里不聞講誦之聲四時不睹  
蒸嘗之位斯豈所謂崇禮報功盛德百世必祀  
者哉嗟乎朕甚懼焉其以議郎孔羨爲宗聖侯



邑百戶奉孔子之祀令魯郡脩起舊廟置百戶  
卒史以守衛之又於其外廣爲屋宇以居學者  
於是魯之父老諸生遊士睹廟堂之始復觀俎  
豆之初設嘉聖靈於髮髯想禎祥之來集乃慨  
然而嘆曰大道衰廢禮樂絕滅三十餘年皇上  
懷仁聖之懿德兼二儀之化育廣大包於無方  
淵深淪於不測故自受命以來天人咸和神氣  
氤氳嘉瑞踵武休徵屢殊殊俗解編髮而慕義  
遐夷越險阻而來賓雖太學遊龍以若世虞氏  
儀鳳以應民作禹命玄言而爲夏后西伯出岐  
社而爲周文尚何足稱於大魏哉若乃紹繼微  
絕興脩廢官疇咨稽古崇配乾坤况神明之所  
福祚宇宙之所觀欣

色豈徒魯邦而已哉爾乃感殷人路寢之義嘉  
先民泮宮之事以爲高宗僖公蓋嗣世之王諸  
倭之國耳猶著德於三頌騰聲於千載况今聖  
皇肇造區夏創業垂統受命之日曾未下輿而  
褒美大聖隆化如此能無頌乎乃作頌曰

煌煌大魏受命溥將繼體黃唐包夏含商降釐  
下土廓清三光群祀咸秩靡事不綱嘉彼玄聖

有邈其靈遭世霧亂莫顯其榮褒成既絕寢廟  
斯傾闕里蕭條靡歆靡馨我皇悼之尋其世武  
乃建宗聖以紹厥後脩復舊堂豐其甕宇莘莘  
學徒爰居爰處王教既新群小邁溫魯道以興  
永作憲矩洪聲豈假神祇來和休徵雜遘瑞我  
邦家內光域區外被荒遐殊方慕義搏拊揚歌  
於赫四聖運世應期仲尼既沒文亦在茲彬彬  
我后越而五之垂于億載如山之基

魏陳思王曹植詞梁鵠書

東魏興和二年兗州刺史李瑛脩孔子廟碑

粵若稽古睿台欽明文思徠宰邁德丕顯九功  
咸事故能庸勳親賢官方式叙惟大魏徙鄴之  
五載皇帝興和之元年天官次洛寅寅出口寔  
惟濟岱宣風敷化義屬英良以君理思優敏實  
惟舊德升朝牧民物望斯允必能絃歌鄒魯克  
振制冊拜我郡公使持節都督兗州諸軍事車  
騎大將軍當州大都督兗州刺史姓李諱瑛字  
仲璇趙國栢人人也其先帝高陽柱史之胤左  
車之綿瑤光休彩赫奕於上齡若水嘉祥扶疎  
於季葉君以資解禍奉朝請俄除定州平北府

法曹參軍仍歷兗郡功曹詒議參軍事定相離  
三州長史東郡汲郡恒農三郡太守司徒左長  
史中散太中大夫營構都將離兗二州刺史所  
在恩庭訓在民懷懷姓易地而貞馥不移君鳳  
舉雲翔風期如一斯寔天懷直至妙與神同悒  
然不樂思仁未深刑平惠和詎爲淳懿崇階  
倉寵之榮奕葉重光之貴氣韻優峻之奇政績  
緝熙之美旣備於史傳於清頌故不復詳載焉  
君神懷疎爽風度絕人學業與淵源並深趣操  
與寒松俱秀故其諱兗部也當未浹旬言觀孔廟

蕭恭致誠敬神如在並迎軻車曲阜飲馬沂流

遊眺覽尚想伊人然必有功之意乃命工  
人脩建容像孔子曰從我於陳蔡者皆不及門  
也因歷敘其才以爲四科之目生旣見從沒若  
之何故顏氏庶幾於易辭起予者商紛  
淪於文詎是則大聖人之道須輔佐而成故曰  
吾有出也吾言不聞於耳所以雕素十子侍于  
其側今於設象聖容奉進儒冠於諸徒亦青  
衿青領雖逝者如斯風霜驟謝而淪姿舊訓駿  
以還新至如廟宇凝靜靈姿嚴麗世代之隔然

以踰七百之遠房不能出夫道繫於人人亡則  
道隱斯大義以之而垂微言以之而絕今聖容  
肅穆二五成行丹素陸離清光輝映但覩其微  
笑而不言左右若承顏而受業是以觀之者莫  
不忻忻然有入室登堂之想斯亦化行一隅也  
天誕聖哲作民師表故休風流闕里播洙泗至  
於嘆鳳鳥之寂寥傷河圖之莫出屢應聘而不  
遇知道德之不行乃正雅頌脩春秋刊理六經  
懸諸日月藏之祖籍莫不得其道以速作服其  
訓以成身茲可謂開闢之儲聖無窮之文宗者

矣此地古號曲阜是惟魯都雖宮觀荒毀臺池  
蕪沒然其廟庭也蔚叢林於九冬單脩柯於百  
仞類神栢之侵漢同梧宮之巨圍至夫鴻隨秋  
下則月秀霜枝燕逐春來而風開翠葉旣足以不  
壯觀瞻亦足以安樂聖靈是以無代不加脩繕  
謠億載以寧神君清明在躬精思入微功被人  
神德貫幽顯豈唯管飾宜質經翔賢容

如虔脩岱像崇奉玄宗敦素剪華興存廢  
絕視民如傷躋之仁壽體古懷以幽詢任萬物  
以爲心直靈津孤灑虛光獨散者夫一月之明

可影百川一人之鑒縱橫萬趣爰自刺舉未或  
斯同然丹青所以圖盛迹金石所以刊不朽章  
不鐫珉瑤焉述府州佐  
略序義目樹碑廟庭俾後來君子知功業之若  
斯焉乃作頌曰

二儀肇判人倫攸舉邈邈玄王誕茲聖胤祖述  
堯舜憲章文武聲溢九天化覃八宇祖翼靈窮  
神盡妙化潭伊何存  
代宗岩岩特峭重山  
自衛言歸德生於予  
同麗景搏天孤昭無異  
隱寶深霞秘暉在哀之葉  
又實在茲彝倫禮樂尅敘

書詩獲麟驚異灰管流氣良木其措綱踰千祀  
以存恕亡允諸靈意不有伊人孰云脩置惟君  
體道布政優優白鳩巢室赤雀棲樓禮罔不備  
知無不周器冠後哲風邁前脩旣繕孔像復立  
十賢誠兼存宇懃盡重玄仰聖儀之煥爛嘉鴻  
業之嬋聯長無絕兮終古永萬億兮斯年

隋大業七年曲阜縣令陳叔毅脩廟記

若夫惟道惟德或仁或義旣漸散於英華遂崩  
摧於禮樂天生大聖是曰宣尼雖有制作之才  
而無帝王之位膺期命世塞厄補空述萬代之

典謨爲百王之師表始於漢魏爰逮周齊歷代  
追封秉圭不絕我大隋炎靈啓運翼下降生繼  
大庭之高蹤紹唐帝之遐統憲章古昔禮樂惟  
新偃武脩文尊儒重學以孔子三十二世孫前  
太子舍人吳郡主簿嗣哲封紹聖侯皇上萬機  
在慮兆庶貽憂妙簡才能委之宰邑於此周公  
餘化惟待一變之期夫子遺風自爲百王之憲  
禮樂舊俗餘何足云用能奉天吉敬先師勸孔  
宗脩靈廟卽曲阜陳明府其人也明府名叔毅  
字子嚴潁川許昌人昔堯之禪舜實釐女於有

虞周室封陳亦配姬於媯洎漢右丞相建六奇  
之深謀魏大司空開九品之清議明府卽陳氏  
高祖武帝之孫高宗宣帝之子至如永嘉分國  
代歷王朝郭璞有言年終三百皇朝大統天下  
一家爲咸陽之布衣實南國之王子於是遊情  
庭宇削跡市朝砥礪身心揣摩道義策府蘭臺  
之秘籍雕蟲刻鵠之文章莫不成誦在心借書  
於手金科玉條之刑法桐囚木吏之奸情一見  
乃知片言能折所謂江珠匿耀時虧滿月之明  
越劍潛光每動衝星之氣爰降詔書乃除曲阜

縣令風威遠至禮教大行政術始臨奸豪屏息  
抑強扶弱分富郵貧部內清和民無疾苦重以  
德之所感霜雹無災化之所行牛馬不繫繩魚  
夜放早彰溉釜之篇乳雉朝馴自入鳴琴之曲  
遠嗤龐統不任百里之才俯笑陶潛忽輕五斗  
之俸於是官曹無事囹圄常空接士迎賓登臨  
遊賞觀泮水而思歌尋靈光而想賦加以祇虔  
聖道敬致神明粉壁椒塗丹楹刻楸可謂誠之  
所至無所不爲振百代之家聲作千城之稱首  
敬鐫金石之文永同天地之固其詞曰

皇非常道帝實無爲時澆俗薄朴散淳離世道  
交喪仁義爭馳書詩逸禮壞樂虧降生大聖  
再脩墳史積善餘德四追崇不已於穆大隋明命  
天子新開紹聖重光九闕里伊我陳君清德遠聞  
溫溫玉潤苾苾蘭方淵才亮美拔類超群時逢  
上聖以我爲令懷之以德導之以政用此一心  
能和百姓子還名賈竟多字鄭奸雄竄伏賦役  
平均心居儉素志守清貧魚生入釜雀瑞來臻  
寢廟孔碩靈祠赫奕圖淵方井綺窓畫壁因頌  
成功遂歌美績共敞穹壤永固金石

辛未七月二日乙酉汝南仲孝俊記

唐贈太師魯國孔宣公碑

臣聞形氣肇分宗匠之途遂廣性情已著名教  
之理攸興是故雕刻爲妙物之先粉澤成眞宰  
之用若其時語棄智則聖非攘臂之端莊寄齊  
諧則禮必因心之範雖九流爭長百家競逐而  
宗旨所歸典墳攸係夫軒義已謝子奴迭微步  
驟殊方質文異轍及流黎起譟箕服傳詠憲章  
板蕩風雅淪喪然而千齡接聖崇朝可期五百

德克造物財成教義彌綸之迹已異總繼心靈  
範圍之功且峻利仁以濟幽顯垂訓以靈動植  
自嘆起臨川道窮反袂西峯琰玉幾燼蒼山東  
野條桑多塵碧海屬混元再造休明一期雅頌  
之音復聞郊禋之禮還緝跨巢脊之逸軌邁龍  
鳥之遐風瞻白雲而升介丘翼蒼鷲而過沂上  
而令乎祀之外典冊遂隆九泉之下哀榮方纒  
斯乃命爲罕說道不預謀豈如箕山之魂空成  
寂寞信陵之墓徒復經過將知龍蛇之蟄潛契  
於天壤聖智所遊高懸於日月言不可極其睚



孔太師乎太師諱丘字仲尼魯國鄒人有殷之  
苗裔也分於宋則孔父嘉爲大司馬弗父何以  
國讓其弟厲公正考父佐戴武宣而受三命居  
於魯則有防叔伯夏叔梁紇紇生太師若夫天  
命玄鳥王篚隆其濬哲瑞啓白狼瑤臺繁其錫  
類武王覆夏仍遷象物之金有客在周復奏桑  
林之樂滋恭喻尸臣之鼎高讓挹延吳之風令  
緒昌源煥乎已遠至如象緯凝質則傳說巫咸  
嵩華降神則車伯吉甫郊禘巨跡鬱符中野之  
祥水帶丘阿遙均反宇之慶蘊乾坤之精粹陶  
陰陽之淑靈度九圍十河日海口放勳文命有  
喻於儀彤子產臯陶微詳於具體孟孫言其將  
聖太宰辯其多能神闕異表性與道合時初冠  
履已訓魯鄉年未裘裳先窺周室猶且學期上  
達業遵下問龍如藏史或訪禮經碧淮萇弘言  
謔易象曲臺相圃廣陳楫讓之容師摯師襄屢  
辯興亡之極網羅六藝經緯十倫加以思入無  
方情該至願陳庭矢集懸駘遠飛季井泉開冥  
占幽怪新萍泛日能對於楚賓舊骨淪風旋詡  
於越使藏往知來之際微妙玄通之旨不可以

龜筮求不可以筌蹄得及其譽聞曲阜南宮展  
師資之敬應務中都西鄰化諸侯之法冬官効  
職五上得其攸宜秋令克宣兩觀展其刑政溝  
疏墓道直季桓田歸汶陽義凌齊景尊君卑  
臣之訓自家刑國之術每惆悵於興周亦留連  
於韶管然而高旻不惠彼日浸微起哀怨於王  
風絕歸飛於鳴鳥是邦可化斯道欲行暖席興  
憂問津匪倦俎豆嘗說空及三軍之容季孟有  
言不接雙雞之膳晏平推士尚或相排子西讓  
王終成見拒亦有宋朝司馬喬木難休衛國匡  
人逆旅焚次荷蕢微者翻嗟擊磬之心儀封細  
人潛明木鐸之意既而在斯興感用輟樓逞狂  
簡斐然彌嗟穿鑿旋驂舊館掃筵闕里杏壇居  
寂緇林地幽知十稽微得三承妙科斗所載方  
閱舊文睢雉存篇編遍詳雅什河漢執鼓鏗鏘之  
響復傳宗廟衣裳升降之儀還序博約無倦誘  
喻多方后稷躬耕近闢勵物伯夷餒死猶可激  
令司公其人則神交於夢想管仲小器則歎徵  
於征伐立德立言太上謂之不朽曰仁曰義前  
哲以之周旋覆篲爲山淪天階而不陟讀易無

過假日蝕以鳴謙茨嶺桐山寄言於獨善岐情  
風御未涉於通莊妙臻數極作侔易簡是知縫  
掖乃兼濟之塗華袞非爲政之要及其愚智齊  
泯椿菌如一南楚狂狷舊辯鳳衰東魯陪臣奄  
成麟斃晨興負杖知命發於話言夕寐奠楹將  
萎傷其溢慮崇山化谷小天下而無由殞石沉  
星架火梁而何有門人議服俱纏至極之哀國  
史制詞永錫懋之誅誕深夏屋樹列遠方五  
勝迭遷六籍無一席間初聞已舛微言入室且  
分過乖大義秦八哇沸遺燼翳然漢代龍驤挾

書未剪元封有述殘缺載陳甘露嗣蹤搜揚復  
起春陵受命先訪於膠庠譙郡膺符多招於文  
學逮江馬南渡泉鵝北飛鶚八環林鯨衝聖海  
有陪交展中原剪覆東序南雍鞠爲茂草六樂  
五禮皆從燬室欽若皇唐肇膺明命祖武宗文  
之業天成地平之勲圖書因樂推重于戈由亂  
輯寧剗舟創浮芹藻之詩先遠戎衣初卷羽籥  
之節旋興皇上以聖敬而撫璇圖以文明而膺  
寶曆夏啓挹其光兆姬誦讓其惟清化入龍沙  
風移鯤海金丘展賈瓊田薦賸滯馬飾黃芝之

封浮龜吐綠文之籀虞庠殷塾廣賓麗叟蓬嶺  
石渠朋延敦誨垂衣裳而凝思虛冕旒以永懷  
至於大道寢微小康遂往羸譏紫色謬踐玄阿  
劉風白金徒遵高里黃初正始時多間然建武  
永平業非盡善而廼作樂宗德殷薦之禮畢陳  
有孚載顛觀下之訓隨設肆類群望孝享之義  
益隆歸功三后尊隆之誠愈切詔寰中而徵萬  
國譯荒外以召百靈一茅分茹雙鸚弁羽翠華  
遠昇枯席虛位上帝儲祉泰乙有暉山祇傳聲  
海神會氣九皇之沉榮可嗣三代之闕典還屬  
廼使朱鳥翔日蒼威戒路七萃騰景八鸞鏘風  
過大庭以省方掩洙上而觀藝宴居莫辯祠堂  
巋然見馬鬣於荒墳識攬檀於古塚歎重泉之  
可作開盛德而必祀言敷訓典廣命杼材贈以  
太師式旌幽壤改制神宇是光令德於時皇唐  
之御天下四十有九載卽乾封之元年也攝提  
之歲勾芒獻節兗州都督霍王元軌大啓藩維  
肅承綸誥兀徒揆日疏閑薙遠接泮林之舊墳  
削靈光之前殿徂徠新甫伐喬木而韻流鸞岱  
畎泗濱採怪石而喧浮磬頽紫施絢黝黛飛文

杏拱重樞春窓秋幌陰欄積霧複閣懷煙几仍  
度室席遵國丈壽宮煥然辟容有穆至如襄城  
有訪七聖接其駢駘汾水言遊四子冥其衡軌  
將謂布衣黃屋名器則殊卷領素王感召宜一  
顏子侍側似發農山之談季路承聞如興浮海  
之說西華束帶尚以要質言優禘裘猶爲得禮  
避席延其不敏捨瑟聽其幽情共列升堂齊參  
觀與歲時蘋藻復雜苜蒲平日絃歌還聞絲竹  
皇儲一德聿隆三善博望邀祿肅成講義發揮  
鑄造幽贊事業而以因禮之觴王毋尚勒西弁  
漢帝之展和發丘因畫東嶽遂迺思建隆碣上聞

天辰言由四因本理會冲情副震宮之德聲合芸  
閣以紉頌上云堂闕兮神靈優揚教思兮兩儀配  
煥皇綱兮神帝載堯可履兮舜爲佩畫而明兮  
夜而晦吁唯業兮麗萬代其詞曰  
赫赫上帝悠悠天造神集鴻名聖居大寶循善  
稱教率性爲道政若鎔金化倂偃草爰畫先起  
律呂創陳禮節天地樂和人神敬期用簡業尚  
日新締無聲臭騰有彝倫水火朝變憲章時革  
周廟傷禾殷墟悲麥褒豔紕雅羸荷淪頤散亂

記言支離方冊自天生德由縱成能賓筵恪嗣  
銘鼎家承蹲龍運舛振鐸宜膺闕典攸緝斯文  
載與廣訓三千徧于七十歷階東會藏書西入  
楚將分社齊聞與邑接輿自在長沮空執在智  
伊妙惟神迺幾羊因魯觸鳥向陳飛邨傳頌管  
編照書章卜商承絢顏子參微堯則不追昌跡  
遂徃名教潛發心靈泛獎德配乾坤業暉辰象  
麟悴遙泣山隕履仰三統昌日千齡聖期禋宗  
有昊展禮崇基觀宣時邁神緘孝思絳螭承軌  
翠鳳翻旗上浮龜蒙遙集鄒魯翹勤真跡懶悵

今古舊壁迷字荒墳翳斧綸音宗師詔緝靈宇

虹梁野構翬翼林舒雕樞繡楠圓井方疏沂童  
浴早泮鳥鳴初俎豆蠲潔丹青藹如墨檢前蹤  
莊放遺轍於昭遐訓允歸聖烈肅穆仁祠陰沉  
像設隨四序以潛運懸三光而不跌

秘書少監通事舍人內供奉崔行功撰

### 重修孔子廟碑

嘗觀元化陰藏上帝玄造雖道遠不際而運行  
有符揚摧大抵宣考神用建人統之可復補天  
秩之將頽其砥一也昔者蚩尤怙賊厥弟驕兵

巨力多徒合緒連禍則黃帝興聖首出群龍推  
下濟以君人微勤略以戡亂逮至橫流方割包  
山其咨轉死爲魚鱸食不粒則堯禹並跡扶振  
隱憂道百川康四國粵若殷禮缺周德微宋公  
用鄩楚子問焉則夫子卓立燦然成章闢邦家  
之正門播今言之彞憲此天所以不言而成化  
聖人所以有聞而必先其若是也故夫子之道  
消息乎兩儀夫子之德經營乎三代豈徒小說  
蓋有異聞夫亭之者莫如天藉之者莫如地教  
之者莫如夫子且沐其亭而不識其道則不如  
勿生荷其藉而不山其德則不如勿運故曰消  
息乎兩儀者也夫博之者莫如文約之者莫如  
禮行之者莫如夫子且會其文而不揚其業則  
不如勿博經其禮而不啓其致則不如勿學上  
代有以焯序中代有以宗師後代有以不訓故  
曰經營乎三代者也意虞舜之美不必至是贊  
而大者進聖君也夏桀之惡不必至是擠而毀  
者激庸主也伊尹之忠不必至是演而數者勉  
臣節也趙盾之逆不必至是抑而書者誅賊臣  
也至若論慈廣孝輔仁寵義職此之由於是君

臣之位序父子之道明朋友之事與夫婦之倫  
得雖朗日開覺膏雨潤黷和風清扇安足喻哉  
借如九皇繼統而政醇七聖同年而道合雖事  
業廣運偕理濟一時未有薄遊大夫僻居下國  
德敷既往言滿方來廟食列邦不假手於後續  
君長萬乘必歸心於素王若此之盛是以騰跨  
百辟孤絕一人曷成名可稱蓋取與爲大者也我  
國家儒教浹寓文思戾天管束曹以追尊逮禮  
官以崇祀侯褒聖於人爵口口尊享於國庠是用  
大起學流錫類孝行懌悅施於方國光覆殫於  
胤宗三十五代孫嗣襲成侯璣之字藏輝伯族  
賢元亨等或專門碩儒百墜于緒或餘波明準  
克揚厥聲乃相與合而誦曰夫墟墓之地禮曰  
自哀聽訟之樹詩云勿剪一則遇事遺愛一則  
感物允懷於乎大聖烈風吾祖鴻美故國封井  
舊居川嶽歟宜其悚神馳魄膝行膜拜陳齋祭  
首嚴祀樹繚垣以設防刊豐石以爲表兗州牧  
京兆韋君元圭字王國周親人才懿德明啓風  
績休有名教長史河南源晉賓字光國賢操孤  
興清節相遠納人以禮成俗於師司馬天水狄



光昭字子亮相門開祥雅道踵武聞義必正從  
事可行錄事參軍東海徐仲連工曹咸陽蓋寡  
疑倉曹太原王道淳司農楊萬石戶曹博陵崔  
少連弘農楊履玄兵曹太原王光超范陽張博  
望法曹安定皇甫佺東海于光彥主曹滎陽鄭  
章參軍事博陵崔調扶風竇光訓河東裴璿隴  
西李紹烈鴈門田公儀博士南陽樊利貞曲阜  
縣令鴈門田思昭丞河間劉思廉主簿吳興施  
文尉清河晏弘楷等官序通德儒林秀士升堂  
觀興遊聖欽風會同演成乃其經如其詩曰  
元天陰騰大明虛鏡神不利滯物將與正凡曰  
接艱在此逢聖吞沙荐雪軒黃底定襄陵兆災  
夏禹文命周道失序夫子歷聘刪詩述史成禮  
張樂雅頌穆清詞訓昭灼片言一字勸美懲惡  
誘進後人啓明先覺六順勃興四維偕作元功  
濟古至道納來首出列聖席卷群才大明震曜  
廣學天開蒸嘗而寓誦習窮垓帝念居室以光  
壽宮建侯于嗣環封厥中孫謀不泯祖德斯崇  
乃刊聖烈克廣休風開元七年歲在辛未十月  
乙酉朔十五日乙亥朝散大夫持使節渝州諸

軍事守渝州刺史江夏李邕撰

麟臺碑

聖人作然後王道明王道明然後瑞應至靈貺  
感通理合冥數昔殷道剝喪民罔攸歸於是文  
王以有位之聖嗣成湯之德神人咸佑故鳳鳴  
于岐洎周德陵夷道靡所屬由是仲尼以無位  
之聖述文武之法憲章聿修故麟見于魯于時  
王室無主禮法盡去天子之尊存乎位號魯周  
公之所封用四代之禮樂鬱而未發仲尼以天  
縱之德生乎其中居周公之邦志文武之道觀  
興廢之運知作者在已位不得以庇生民權不  
得以司刑賞是天將喪斯民也而未喪斯文也  
乃綴絕緒申舊章變其禮文酌爲典憲擊五常  
之龜鑑遵三綱之軌轍帝王之道幽而復明盛  
德大業於是乎在天錫嘉瑞光昭厥功故周敬  
魯哀不得而有也由此觀之蓋春秋爲王法之  
器魯國爲王法所寄在其所寄以舉其器鼓仁  
義爲舟航權褒貶爲楫櫂乘橫流之波濟天下  
之溺上無列國之輔下無陪臣之助故道不信  
於天下而信於智者法不著於當時而著於後

代向使仲尼有滕薛之士得三家之衆興我王  
澤沛及蒸民則麟出於其郊得其所矣豈復厄  
於虞人哉故麟不見則孔子之道不彰麟不死  
則周室之亂不極嗚呼聖人之生也得其時則  
化行乎江漢不得其時則道屈於季孟靈瑞之  
出也得其時則名薦於郊廟不得其時則身羅  
於殘天是以聖人能順時以濟人不能反時以  
自聖靈瑞能因時以應感不能反時以自靈被  
厄於陳蔡見獲於大野影響之應其符著矣春  
秋傳曰有以告者曰麇而角者何孔子曰孰爲  
來哉夫豈不知乎蓋遜之而不敢有示人以疑  
也元和五年冬十一月表微以滑之從事使於  
鄆陽停驂訪古得獲麟之舊壤且日後之人築  
臺於此以旌厥德感先聖之不遇悼麟出之非  
時徘徊肩道乃作銘曰

二儀旣闢三象乃乖聖道堙鬱人心不開上無  
文武下有定哀于嗟麟兮孰爲來哉周雖不綱  
孔實嗣聖詩書載刪禮樂大定懲惡勸善效邪  
反正于嗟麟兮克昭符命聖與時合化行位尊  
苟或乖戾身窮道存於昭豐邑栖遑孔門于嗟

麟兮孰爲其仁運極數殫道至時否楚國寢廣  
秦封益侈墻仞迫阨嶠嶮闕里于嗟麟兮靡有  
攸止世理則麟世亂則麀出非其時糜鹿同群  
孔不自聖麟不自神于嗟麟兮夫何所云  
是年月日章表徵撰

懿宗咸通十年修文宣王廟記

皇帝御寓之十年歲在己丑夫子三十九世孫  
魯國公節鎮汶陽之三載秋霜共凜冬日均和  
里閭無桴鼓之聲耆艾有禱禱之詠道已清矣  
政已成矣於是瞻故鄉以徘徊想廟貌而惆悵  
乃謂僚佐曰伊予聖祖實號儒宗英靈始謝於  
衰周德教方隆於大漢爰因舊宅是構靈祠粵  
自國朝屢加崇飾文棟繡桷雖留藻繪之功日  
往月來頗有傾摧之勢故老動悽涼之思諸生  
興嗟嘆之音今忝鎮東平幸邇鄉里雖無出展  
敬而敢忘修營旣而飛章上陳請以私俸葺飾  
由是命工庀事飾舊如新浹旬之間其功乃就  
門連歸德先分數仞之形殿接靈光重見獨存  
之狀曄容穆若更表溫恭列侍儼然如將請益  
冊楹對峙還疑夢奠之時素壁高標宛若藏書

之所槐影踈而市晚杏枝暗而壇孤不假大夫  
幽蘭自滿無煩太守刺草全除稷門之舊業俄  
興闕里之清風再起旣可以傳芳萬古亦可以  
作範一時且開闢以來王霸之道言其德也莫  
踰於湯武語其功也無尚於桓文墳土未乾而  
丘壠已平子孫縱存而蒸嘗悉絕夫子無尺寸  
之地微一旅之衆脩仁義者取爲規矩肆強梁  
者莫不欽崇生有厄於棲遲沒居尊於南面而  
樵蘇莫採廟貌長存道德相承簪裾不絕則夫  
子之道旣可彰於遠善善公之德寔無愧於畢  
脩防日觀靈蹤躬尋盛績仰聖姿安而如在歎休  
烈而難名承命紀功讓不獲已刻諸貞石深愧  
菲才謹記

攝鄆曹濮等州館驛巡官鄉貢進士賈防撰

### 重建鄆國夫人殿記

先聖之夫人曰元官氏子孫祀於寢宮舊矣宋  
祥符初旣封鄆國始增大其殿像季未燬焉金  
國皇統九年始以公錢復修正殿後八年又營  
兩廊而積羨錢二百萬將以爲鄆國殿之用而  
未給也大定間上留意儒術建學養士以風四

方舉遺禮修廢墜曠然欲以文治太平襲封公  
摠躍然喜曰祖庭之復此其時乎乃以殿之規  
模自有司而有司吝於出納乃更破廣爲狹刻  
崇爲卑繇是別得故時羨錢爲殿費襲封公蹙  
然曰是規模者豈能稱前殿爲王寢乎吾獨以  
奉祀事守林廟爲職故不得以專達雖然我豈  
敢不力乃與族祖端脩親率廟丁載斤斧走東  
蒙深入數百里歷巖險冒風雨與役者同其勞  
得其松中椽撩者以千數又與族兄播市材于  
費凡焚櫨棋楠之屬皆取足焉會祖林大槩數  
十一且皆樞死適可爲楹棟之材而二百萬者  
止足以充瓦甍堊甃與夫梓匠傭直而已時劉  
公璋爲節度副使實董其役趙公天倪爲判官  
二公廉直而幹吏不敢擾以私而襲封公得以  
盡其力粵十九年冬殿成安奉之日士庶咸會  
顛首聚觀邦人族戚更贊迭助父老嗟嘆至或  
感泣亂者綱紀之建末俗之郭郭垂萬世之楷  
則遂使君臣父子咸知揖讓之儀貴賤親踈咸  
知等夷之數功均造化德被生民昭昭焉蕩蕩  
焉與日月高懸天壤不朽者夫子之道乎故曰

自生民以來未有如夫子者也非夫道尊德貴  
惟幾不測孰能與於此乎故天下奉其教尊其  
像祠廟相望者豈徒然哉自唐季而下晉漢以  
還中原俶擾寓縣分裂四郊多壘鞠爲戰鬪之  
場五岳飛塵竟以干戈爲務周雖經營四方日  
不暇給故我素王之道將墜於地光闡儒風屬  
在昌運我應運統天膺文英武大聖至明廣孝  
皇帝繼寶位也以徇齊之德兼平唐世之明摠攬  
英雄之心包括夷夏之地皇明有赫聖政日新  
解纒泣辜示至仁於天下侮亡取亂清大憝於  
域中復浙右之士疆真王制匄而聽命伐并汾  
之堅壘兇酋倒戈而係頸戎車一駕掃千里之  
祇氛秦壇再陟旻三代之縉禮拯亂則吊伐非  
所以佳兵也懲惡則止殺蓋所以遵法也然後  
修禮以檢民跡播樂以和民心禮修樂舉刑清  
俗阜尚猶日慎一日躬決萬機近甸絕禽荒之  
娛後庭無遊宴之溺遂得群生麀鹿但樂於天  
時萬彙熙熙不知乎帝力信可以高視千古嚙  
轡百王謂皇道旣以平羣夷又以寧爾乃凝神  
太素端拱穆清闡希夷之風詮真儒之理聞則

披皇墳而稽帝典奮齊濬藻以抒宸章哲王之能  
事備矣太平之鳩業成矣居一日乃御便殿謂  
侍詔曰朕嗣位以來歲秣無文徧修群祀金田  
之列斜崇矣神仙之靈宇修矣惟魯之夫子廟  
堂未加營葺闕孰甚焉况像設卑而不度堂廡  
陋而毀頽觸目荒涼荆榛勿剪階序有妨於函  
丈崖壁不可以藏書既非大壯之規但有巋然  
之勢傾圯寔久民何所觀上乃鼎新宏規革去  
舊制遣使星而藏事募梓匠以儆功經之營之  
厥功告就觀夫繚垣雲矗飛簷翼張重門呀其  
洞開層闕鬱其特起網疏瞰野朱檻凌虛眈眈  
之邃宇來風轆轤之雕甍拂漢迴廊復肆一變  
惟新升其堂則藻火黼黻昭其度也登其筵則  
豆籩簠簋潔其器也春秋二仲上下佳辰牢醴  
在庭金石在列侏侏衆賢以配以侑凜然生氣  
瞻之如在時或龜山雨霽岱嶽雲歛則重櫺疊  
棋丹青晃日月之光龍榆雲楣金碧焜煙霞之  
色輪奐之制振古莫儔營繕之功於今爲盛繇  
是公鄉庶尹鴻儒碩生相與而言曰凡明君之  
作事也不爲無益害有益必乃除千古之患興



萬世之利然後納華夷於軌物致黔首於仁壽  
夫子無位立教化人以文行忠信敦俗以冠昏  
喪祭爲民立防與世垂範是以上達君下至民  
用之則昌不用則亡我后膺千年而出震奄六  
合以爲家一之日二之日訪黎烝之疾苦三之  
日四之日辨官材之淑慝爾乃修武備崇文教  
輕徭薄賦興廢繼絕于時瞻我先師嚴其廟像  
棟宇宏壯近罕比倫遂使槐市杏壇之子競鼓  
篋以知歸褒衣博帶之儒識橫經之有所矧乃  
不蠹民財不耗民力時以農隙人以悅使向謂  
興萬世之利者斯之謂歟夫六秦修阿房惟矜土  
木之麗楚築章華但營耳目之玩何可同年而  
語邪將勒貞珉盍資鴻筆臣詞慚體要學謝大  
成彫庭猥廁於英翹內署繆司於綸誥頌聖君  
之德業雖效游揚仰夫子之文章誠慚狂簡恭  
承睿旨謹抒銘曰

周室衰微兮諸侯擅權 魯道有蕩兮禮樂缺然  
神降尼丘兮德重于天 挺生夫子兮喪亂之年  
秀帝堯之姿兮類子產之肩 包聖人之德兮稟  
生知之賢 刪詩定禮兮糾繆繩愆 智宜造化兮

功被陶甄下學上達兮仁命罕言將聖多能兮  
名必正焉道比四瀆兮日月高懸仰之彌高兮  
鑽之彌堅歷聘諸國兮陳蔡之間時不見用兮  
吾道迤邐遭麟見非應兮反袂漣漣梁木其壞兮  
嘆彼逝川王爵疏封兮袞冕聯翩百世嗣襲兮  
慶及賞延明明我后兮化浹無邊崇彼廟貌兮  
其功曲全高門有闕兮虛堂八埏吉日釋菜兮  
陳彼豆籩雕甍畫楹兮旦暮含煙海日一照兮  
金碧相鮮帝將東封兮求福上玄千乘萬騎兮  
肅肅闕闕謁我新廟兮周覽踟躕肆觀群后兮

岱宗之前

翰林學士朝散大夫尚書都官郎中知制誥在  
國賜紫金魚袋臣呂蒙正奉勅撰

五賢堂記

五星所以緯天五嶽所以鎮地五賢所以輔聖  
萬象雖列非五星之運不能成歲功衆山雖廣  
非五嶽之大不能成厚德諸子雖博非五賢之  
文不能成正道繇是三才之理具萬物之情得  
故聖人與天地並高卑設位道在其中矣所以  
尊君德安國紀治天物立人極皆斯道也然天

地有否閉日月有薄蝕聖人之道有屯塞若天地否則聖人建大中之道以開泰之苟聖人之道壅則五賢迭起而輔導之先聖生當戰伐世法令機祥巫祝之弊享楊墨之迂誕莊列之恢詭窮聖汨常三騶孫田術勝於時則我聖人大道爲異端破之不容於世也而孟荀繼作乃述唐虞之業序仁義道德之源俾諸子變怪不軌之勢息聖人之教復振其功甚大矣後至漢室圯缺揚子惡諸子知舛詆訾聖人獨能懷二聖三王之迹譏時著書以尊六聖使古道昭昭不泯者揚之力也西漢之後皇綱弛紊六代喪亂文章散靡妖狂之風蕩然無革文中子澄其源兆興王之運韓文公治其末廣尊道之旨致聖化益光顯夷夏歸正道雖諸子誹謗或欲操其法戕其教榛其塗蕪其說弗可得已然賢者建世矯俗能去難者蓋寡失子孟不免齊梁之困滅倉之毀荀不免齊人之讒楚國之廢揚不免劉歆之侮投閣之患王不免隋氏之抑群公之沮韓不免潮陽之竄皇甫之譖其間或譏其作經或短其脩史彼徒能毀之弗顧已之弗逮也達

者以爵位爲虛器大過者人猶嫉之兄抱道德  
富仁義立終古之名寧無惡乎天地雖否無傷  
於體日月雖蝕無傷於明聖賢雖困無損於道  
得其時則堯舜禹湯之爲君臯夔伊呂之爲臣  
功濟於當世也非其時則孔聖之無位五賢之  
不遇遊行於後世矣亦猶歲旱則澤之益甘夕  
暗則燭之益明世亂則賢者益固歷代以斯爲  
難也孔聖之道否則五賢振起之今五賢堙蔽  
振之者無聞焉道輔學不及前哲而以中正  
于帝皇幸不見黜而進冀以賢者必輔於時  
躋於古以茲爲盛矣方車親守故國爲儒者榮  
葺謂伏生之徒以訓陳功象設於祖東西序而  
五賢立言排邪說翊大道非諸子能跂及反不  
及配缺孰甚焉因建堂收五賢所著事圖其儀  
殺先儒之時薦庶幾識者登斯堂觀是像覽是  
書肅然革容知聖賢之道盡在是矣

景祐五年七月十五日給事中知兗州孔道輔撰  
金重修至聖文宣王廟碑

皇朝誕膺天命累聖相繼平遼破虜合天下爲  
一家深仁厚澤以福斯民粵自太祖暨于世宗

撫養生息八十有餘年庶且富矣又將教化粹  
美之主上紹休祖宗以潤色洪業爲務卽位以  
來留神機政革其所當革興其所當興飭官厲  
俗建學養士詳刑法議禮樂舉遺修舊新美百  
爲期與萬方同歸於文明之治以爲興化致理  
必本於尊師重道於是僉謁先聖以身先之嘗  
謂侍臣曰昔者夫子立教於洙泗之上有天下  
者所當取法迺今遺祠久不加葺且甚隘陋不  
足以稱聖師之居其有以大作新之有司承詔  
度材庀工計所當費爲錢七萬六千四百緡詔

並賜之仍命選擇幹臣典領其役後取於軍匠  
傭於民不責急成而責以可久不期示侈而期  
於有制凡爲殿堂廊廡門亭齋厨畱舍三百六  
十餘楹位序有次像設有儀表以傑閣周以崇  
垣至于榭座欄楯簾橫梁楹之屬隨所宜設莫  
不嚴具三分其役因舊以全加葺者十居其一  
而增創者倍之蓋經始於明昌二年春踰年而  
土木基架成越明年而髹漆彩繪成先是群弟  
子及先儒像畫於兩廡旣又以捏塑易之又明  
年而衆功皆畢罔有遺焉上旣加恩闕里又澤

及嗣人以其雖襲公爵而官職未稱與夫祭祀  
之儀不備特命自五十一代孫元措首階中議  
大夫職視四品兼世宰曲阜縣六年又以祭服  
祭樂爲賜遣使策祝以崇成之意告之方役之  
興也有芝生於林域及尼山廟與孔氏家園凡  
九本典役者采圖以聞且言瑞芝之生所以表  
聖德之至廟成之日宜有刊紀敢請並書于石  
又廟有層閣以備度書願得賜名揭諸其上以  
觀示四方詔以奎文名之而命臣懷英記其事  
臣魯人也杏壇舊宅猶能想見其處今幸以諸  
生備職藝苑其可飭固陋之辭挈櫛計功謹識  
歲月而已乎敢竊叙上所以褒崇之意備論而  
書之而後係之以銘臣嘗謂唐虞三代致治之  
君皆相授以道至周末世不得其傳而夫子載  
諸六經以俟後聖降周迄漢異端並起儒墨道  
德各法陰陽分而名家而以六藝經傳爲章句  
之學歸之儒流不知六藝者夫子所以傳唐虞  
三代之道衆流之所從出而儒爲之源也後世  
偏尚曲聽泐其流而莫達其本用其偏而不得  
其醇自是歷代治蹟嘗與時政高下洪惟聖上

以天縱之能興學稽古游心於唐虞三代之隆  
故凡立功建事必本六經爲正而取信於夫子  
之言夫惟信之者篤則其尊奉之禮宜其厚歟  
臣觀漢魏以來雖奉祠有封酒掃有戶給賜有  
田禮則修矣未有如今日之備也初廟傍得魯  
廢池發取石甃以爲柱礎階砌之用浚井得銅  
以爲鋪首浮漚諸飾繇是省所費錢以千計者  
萬四千有奇方復規畫爲他日繕治無窮之利  
然則非獨今日之新蓋將愈久而無弊也銘曰  
維古治時以道相繼不得其傳粵自周季天生  
將聖遭世不綱垂統六經以俟後主六經維何  
爲世立道有王者興是惟治要於鑠我皇聖性  
自天玩意稽古傳所不傳建學弘文崇明儒雅  
躬禮聖師率先天下乃瞻闕里祠宇弗治矧其  
舊制旣隘且庠乃詔有司乃疏泉府揆材庀工  
衆役具舉梓人戲技後夫効功隘者以宸庠者  
以崇崇焉有制宸焉有法卽舊以新增其十八  
植植其正翼翼其嚴魯人來思歎息仰瞻魯人  
有言惟今非昔豈惟魯人四方是式瞻彼尼山  
及其林園有芝之煌煌表我聖恩聖恩之隆施於

後嗣顯秩峻階視舊加異廟樂以雅祭服有章  
錫爾奉祠名教是光有貞斯石有銘斯勒楊厲  
鴻休以詔無極

翰林學士知制誥同修國史党懷英撰

重建鄆國夫人殿記

聖人之興也能成天下之務能通天下之志然  
亦不能免窮通否泰之數是故有其位則聖人  
之道泰無其位則聖人之道否大哉堯舜禹湯  
其有位之聖人歟我先師夫子其無位之聖人  
歟昔者大道既隱真風漸漓有爲之跡雖彰禪

代之風未替繇是堯舜禹湯包至聖之德有其  
位故德澤及於兆民逮乎周室衰微諸侯強盛  
干戈靡戢黔首疇依繇是仲尼有至聖之德無  
其位所以道屈於季孟嗚呼夫子以天生之聖  
智足以周乎萬物道足以濟於天下而棲遲列  
國卒不見用得非其道至大而天下莫能容乎  
復乃當時之生民不幸乎向使其位用其道  
又何止於夾谷之會沮彼齊侯兩觀之下誅斯  
正卯藉羊辨土木之妖楷矢驗蠻夷之貢必將  
恢聖人之道功濟乎宇宙澤及於黎庶矣奚一



冲都宰大司寇可伸其聖道哉嗟夫文王沒而  
斯文未喪時命屯而吾道不行可爲太息矣洎  
乎河圖不出鳳德云哀爰困蔡以厄陳遂自衛  
而返魯于時刪詩書贊易象因史記作春秋大  
旨尊王者而黜霜道滅亂臣而誅賊子然後損  
益三代之禮樂褒貶百王之善惡蕪穢者芟夷  
之紊以爲復見太平之舉也於是龔封公被召  
至闕下未幾得以舊爵宰鄉邑將歸固索鄙文  
則叙其修殿本末而爲之說曰嗚呼聖人道極  
中和而與天地並有天地而夫婦之道立道立  
而父子君臣之教達於天下古先哲王所以御  
家邦風動教化皆由此始吾夫子出著之六經  
實綱而紀之以垂憲百代故後世推尊以爲人  
倫之首而闕里舊宅四方於是觀禮然則所謂  
作合聖靈者其奉事之禮安可以不稱今夫浮  
屠無夫婦絕父子廢人倫其空言幻惑且不足  
以爲教然貪得而畏死者奔走敬事至傾其家  
貲非有命令賦之也而其雄樓傑閣窮極侈靡  
僭越制度耗盡齊民有司者不以禁而吾夫子  
之宮教化所從出有司乃以爲不急一殿之建

至於身履勤苦然猶積年而僅成何其難也嗟乎夫子萬世之師也今休明之代不患其不崇吾獨惡夫恃人倫者方起而害名教故因是殿之後有以發是言也若歸其并刻之庶幾貪異而惑於異端者知所復焉

大定三十一年正月十有一日翰林學士党懷英撰

東游記

壬子元憲宗二年時春三月十六日庚子東平

行臺公宴于東園是日衣冠畢集既而請講關

里迨丙午乃命監脩官盧龍韓文獻德華上谷

劉詡子中相其行丁未同德萃子中暨攝祀事

孔構噐之梁山張宇子淵汴人郭敏伯達出望

嶽門幕府諸君若曹南商挺夢卿范陽盧武賢

叔賢毫社李禎周卿江陵勾龍瀛英鷲信都李

簡仲敬濟陰江紱孝卿梁園李紱綬卿萃亭段

彌輔之祖於東湖之上既別自西而東行六十

里宿汶上縣劉令之容廳汶上古之中都也魯

定公九年先聖宰於此縣署之思聖堂是也戊

申晨起噐之從間道先往是日至兗州會州佐

孟謙伯益教官張鐸振文已酉拉振文而東不四五里過泗水又一舍許達于苗孔村見曳而斷者其魯城歟鱗而合者其孔林歟不覺喜色津津溢於眉睫也未幾器之輩躍馬出迓遂入自歸德門魯門一十有二正南曰稷左曰章右曰雩正北曰圭左曰齊右曰龍正東曰建春左曰始明右曰鹿正西曰史右曰麥歸德其左也當時天下學者多由是門入故魯人以此名之族長德剛又率諸子弟姪送于廟之西相與却馬鞠躬趨大中門而東山廟宅過廟學自齋粹門之北入齋廳在金絲堂南燕中門之北堂取魯共王事也是日私忌不敢謁庚戌鍾鳴班杏壇之下痛廟貌焚燬北向鄆國夫人新殿設繪像脩謁而板祝如禮告先聖文宣一曰嗟乎聖人造物也七十子造物之物也於問答之際見之矣問仁者七而答之者七問孝者四而答之者四問政者九問君子者三所以答之者無一似焉不惟不違其所長而亦不強其所不能故入以成其大小以成其小造物奚間焉垂世立教自王所仰未有由之而不治舍之而不亂者

也春秋諸國孰弱於魯降千八百年而知有魯者吾聖人之力也吁生而不見用沒而賴之以聞何負於魯也後之有國有家者獨不思之邪今日何日制匄庭下死無憾矣羈旅悠悠禮物弗備敢薦以誠告先師魯國公曰夫士君子之學原於治心聖門三千徒孰非學也日好之者獨公爲然無事業見於當時無文章見於後世考之傳記一再問而止察之日用一簞瓢而止繇亘百世之下自天子達於庶人無敢疑議者將從無慾始乎抑非也不可得而知也適謁林

廟獲瞻井里輒祭以告先師鄒國公曰子之

於聖人其猶天而地之日而月之歟學出於詩書道兼乎仁義至於知易而不言易知中庸而不言中庸此又人之所難能也湯武則待子而義匡章則待子而孝紛紛楊墨之徒待子而後黜其爲功用鴻且著矣夫豈好辯者哉與等去聖彌遠欲學無師而復執志不勇惟神其相之降階謁齊國公魯國夫人之故殿殿西而南向者尼山毓聖侯也次西而東向者五賢堂也謂孟也苟揚也王與韓也碑孔中丞道輔文中丞

篤於信道者也於家法無愧矣遂飲福于齊廳  
賓主凡二十有五人酒三行而起執事者族中  
子弟也進退揖讓禮貌可觀信乎遺澤之未涸  
也焉知教養之久明詔之下人物彬彬不有經  
學如安國政蹟如不疑者乎杏壇一字竹溪堂  
懷英書壇之北世傳子路捨丁石蓋石之屬也  
夫所謂勇於義而已豈區區若是邪壇南十步  
許真宗御贊殿也七十二賢并諸儒贊從臣所  
撰貞祐火餘物也手植僧三而兩株在贊殿之  
前一株在壇之南焚燬無復子遺好事者或爲

肖像或爲簪笏而香氣時異趙太學秉文麻徵

君九疇有頌有詩世多傳誦之次南碑亭二東  
亭宋碑一呂蒙正撰白崇矩書太平興國八年  
十月建金碑一党懷英撰并書篆西亭皆唐碑  
也一碑崔行功撰孫師範書碑陰刻武德九年  
十二月詔又乾封元年二月祭廟文一碑江夏  
李邕撰范陽張庭珪書開元七年十月建次南  
奎文閣章宗時翔明昌二年八月也開州刺史  
高德齋監脩閣之東偏門刻顧凱之行教吳道  
子小影三像東廡碑六皆隸書而魯郡太守張

府君碑非也西廡之碑八隸書者四餘皆唐宋  
碑也是日宴罷併出北偏門由襲封廨署讀姓  
系碑文又北行由陘巷觀頽井亭亭廢矣北出  
龍門入孔林徘徊思堂之上由輦路而北夾路  
石表二石獸四石人二獸作仰號之狀拜奠先  
聖墓如初禮墓前有壇石厚三尺許方如之其  
數四十有九後漢永嘉元年魯相韓叔節造東  
連泗水侯伯魚墓南連沂國公子思墓世家云  
相去十步耳而密邇若此疑後人增築之也然  
規制甚小禮之所謂馬鬣而封者是也子思之  
西石壇居攝元年二月造有日上谷府卿者有  
曰祝其卿者先聖墓西白兔溝也二石獸伏甚  
惟林廣十餘里竹木繁茂未見其比而楷木以  
文爲世所貴無荆棘無鳥巢將吾道終不可蕪  
沒而鳳鳥有時而至歟林東三里講堂也林與  
堂俱在洙北泗南按世家云周敬王三十六年  
孔子自衛反魯刪詩書定禮樂繫易於此硯臺  
井在其西惜去秋爲水漫沒矣辛亥謁周公廟  
廟居孔廟之東北三里有真宗御贊碑車輛井  
在正東少南水清白而甘俗呼漿水井者是也

廟北雙石梁井石上綆痕有深指許者東北大井圓徑六十尺深二丈水色墨如也東過顏侍郎墓林城之址顏廟也廟中孤檜高五丈餘由曲阜西復東北行十里入景靈廢宮觀壽陵陵避諱而改也東北至褻丘少昊葬所壽陵於宋時疊石而飾之也前有白石象爲火爆裂壇之石攔窮工極巧殆神鬼所刻也讀碑記始知草創於祥符潤飾於政和而大定申因之而不毀也大碑四諺云萬人愁者是也而一碑廣二十有三尺闊半之厚四尺屬巔高十有三尺闊如之厚四尺龜路十有八尺二碑廣二十有四尺闊半之厚四尺屬巔高十有八尺闊十有六尺厚四尺龜路十有九尺一在城之外一在城之內無文字意者垂成而金兵至也入東門餘器之家復西南馳觀漢之魯諸陵大塚四十餘所石獸四石人三人曾臆間篆刻不克盡識有曰滄樂安太守廉君墓塚者有曰府君之某者折而北渡沂水入大明禪院觀遶泉水中有山出如伏甃怒鼉寺碑云魯之泉宮也薄暮歸自稷門望兩觀登泮宮臺臺下之水自西而南深丈許而無源吁僖公

一諸侯能興學養士如此三詠采芹之章而後  
下其西靈光殿基也破礎斷瓦觸目悲涼而王  
延壽所謂俯仰憑眺東西周章者今安在哉壬  
子復由縣城東北行十里許過陶樂村南望脩  
壠蔓延不絕者屬之魯陵也東南五里達層溝  
村拜聖者齊國公古林廣四十畝墓前石刻甲  
辰春二月望日五十一世孫元措立石溝水在  
林之東北入于泗其南防山也而山之峯東西  
五里云合葬於防山是也林之北東蒙路也自  
西峯而南謁顏子墓石刻曰先師堯國公大定  
甲辰三月先聖五十一代孫承直郎曲阜令襲封  
衍聖公孔摠立石八原王筠書墓前一石僅二  
尺許兩甲士背附而坐一執斧一執金吾正北  
有小塚不可考顏氏子孫二房在少東上宋村  
是日東南行並七八山而西由白村歷西魯原達  
東魯原館房氏之泗川公古具雞黍以待古孔  
氏壻也問之不知爲公孫公西也地多虎狼牧  
者爲之懼比曉幸無所苦癸丑穿林麓而東約  
六里許達尼山五峯隱隱在霄漢間而中峯廻  
出首之所謂坊其頂者是也廟廢雖久而規模



猶可見其前智源谿橋也端南卽大成門次北者卽大成殿也其東泗水侯殿其西沂水侯殿也大成之後鄒國夫人殿也其後齋所也西有齊國魯國之殿齊國之東南而南向者毓聖侯殿也大成之西爲觀川亭也瓦櫟中得一斷石蓋壑也廟之西爲觀川亭也瓦櫟中得一斷石蓋前進士浮陽劉燁夾蘆辨也或曰夾驢劉惡其鄙俚故辨正之夾蘆峴在尼山西山亭之東回旋而下得坤虛無洞石角濺濺不可入族長云廟戶管用吉成也其持火曳繩而入此三數丈忽隙間有光觀一室口廣兩楹許中橫石牀石枕皆天成也而不可動今五十年矣以管與吉幼而瘖故可入也所言如此洞名劉燁之所刻也因漲沂水過顏母山下觀文德林以草木啗翳廟與聖井無所見尋舊路復達魯原替已西南瀕竭下而卿庄泗家庄歷峻山二十里而近達四箕山遇兵士傳正徐州人道至鄒國公墓墓在廟之東北有泰山孫復碑孔中丞立石其西大塚七比正墓屋小無從考之南有寺曰亞聖寺有碑傍有古墓三行四五里過黃注村又十里

出戶經埠正南少西行二十里達鄒縣宴彭令  
宅四月甲寅朔飯後出南門二十五里許達嶧  
山循山之西北絕澗亂石如屋旣而過道者李  
志端爲之前導復西北行遊太湖懸鐘二洞東  
南行入燕子岩僕以病足與德華岩下坐待諸  
君之還哺時子中輩踵至國祥且示嶧山圖蠟  
紙按圖指顧若仙橋之巨石七真之西軒下瞰  
紀侯之重城漢相之故塚一如眼底如玉女峯  
千佛塔尤號竒絕所至流水脩竹雜花名果殆  
若屏而面容縷數哉逼夕陽下山迤邐由西北  
而進達于縣之南關報孟氏諸孫迎于道左卽  
造鄒國公廟庭奠已入縣復宴於舊館父老請  
見爲歡飲竟夕乙卯出西門北行十里入崗山  
寺而孟氏諸孫復携酒至山竹徑渡橫橋休于  
主僧之靜室良久出山東北行二十五里達馬  
鞍山謁孟母墓北行十五里達趙山莊飯孔族  
家又十里許達于魯城之南登郊臺臺東西五  
十八步南北四十步魯之臺可見者二是臺與  
泮宮臺莊公臺也北涉沂水由竹逕登浮香亭  
亭以梅得名少北一石穴茶泉也亦竹溪書而

不名緬思前輩風度又有足敬也丙辰曲阜官  
佐至以私忌不敢飲丁巳將訪矍相圃會公叔  
五十二代孫遣其子治同諸官佐具酒饌復至  
不果時公叔抱樂正子之疾戊午從德剛子中  
登西南角臺望射圃圃在歸德門裏道側積上  
隱起草中或其所也臺泰和四年七月六日故  
人夢得之所築也竊有感于懷夢得元措字也  
是夕孔族設祖廟于齋廳己未辭先聖於杏壇之  
下族長德剛率族人別於歸德門外國祥暨德  
剛之子立之護至兗州西鳴呼讀聖人之書遊  
聖人之里幸之幸者也然有位者多以事奪無  
位者或苦力之不足也况以鄧錫之西望鄒魯  
之遠與南北海之所謂不相及者何異焉流離  
頓挫中有今日之遇伯達既繪爲圖且屬僕記  
之敢以衰朽辭勉強應命將告未知者是歲四  
月五日紫陽楊奐記

脩闕里廟垣記

闕里廟制周三里而弱崇垣四護皆埽以粉塗  
庇以瓦木與夫殿閣門廊等餘五百架皆金明  
昌後也 經喪亂表裏凋敝中更灑掃百戶暫

停主祀財單力薄扶傾綴朽聯缺續聖所成者  
不償其所壞朝廷頻年議加修復屢符本路揆  
度工費以軍國庶務方殷而事未及措也曩者  
山東東西道憲司諸公自陳節齋已下近及簽  
司粵屯公皆嘗督論本部爲救廢之舉迨夫奉  
議大夫同知濟寧路總管府事劉任用至元壬  
午秋七月繼謁祠下奠拜既畢周覽嗟惜而言  
曰夫州縣長佐之吏考績於三載必曰文廟有  
無增葺况予爲方面之倅祖庭在境而曾未過  
省何以處承流宣化之任乎今朝廷方當布文  
教善風俗以爲致治之本而於吾聖人祠宇切  
於垂意輦石伐木築基定礎期在旦夕矣今廟  
貌雖殘所餘者徃徃猶夏宇傑觀而周垣比剝  
外連於荒莽脫有野燒緣逸於其中不亦愈重  
朝廷之經費乎此事吾儕不得不任其責以今  
竊計莫若規撫舊跡先起垣於四周庶或可以  
扞蔽他虞也凡茲所舉有涉公帑之費者予固  
不得以擅爲以吾聖人之故妨其農事重其民  
役而俾之嗟怨予尤不敢爲也秋冬之交農事  
畢入蠲減他調而爲之不亦美乎及歸更與同

僚謀之時總府判官李侯書生也聞之樂與協其謀劉侯之志得以不沮遂命孔氏五十三代孫權主祀事曲阜縣尹親蒞其役仍以兗州檢校之乃於戶大丁衆之家從民意而借其力民皆曰此非公役維吾鄉中之盛事復何辭焉於是相與執版榦楨削之具而至者幾千人於是唯均之以廣袤而不限其程勉之以堅整而不責其緩繹繹繩繩陬陬登登不亟不遲百堵皆興縮甚於季秋之將杪斬木於陽月之旣盈宰牲醴酒勞其衆而歸之仍期於來春之首變高堙深夷蕪易區畝益植松榆一千本于時衣冠行路莫不稱歎以爲殿閣崇巖倍增於他日巖巖乎可謂夫子之墻也孔氏合辭爲予言曰自東平巖公致政之後而能加顧於祖庭者蓋鮮矣今侯體朝廷之意以繼是美是不可以不錄桓時親觀其事義不當讓乃撫其本初而題之於壁門

至元十九年冬十有二月望日濟寧路教授楊

桓記

祀宣聖廟記

至元二十有一年皇帝念齊魯未平特命中書  
平章政事知河南山東等處行樞密院事兼陝  
西諸道行御史臺御史中丞察罕帖木兒往平  
之公祇服明命大會諸將于洛陽蒐軍實闔武  
備發秦晉河洛兵渡孟津踰太行出井陘口旌  
旗千里鼓行東下粵六月辛卯躬帥鐵騎建大  
將旗鼓以進七月至冠州河西降次東昌楊誠  
以金城獻八月渡鹽河分遣裨將帥偏師搗東  
平與東平賊遇河東兩戰大破之伏尸四十里  
斬首二萬級直造城下渠寇田豐降傳檄郡邑  
不旬日悉定魯地公曰東魯爲禮義絃誦鄉闕  
里宣聖廟所在山兵興墟荆棘民魑魅族人士  
大夫逃難解散四方祀典廢弛將數年今境土  
廓清宜嚴脩祀事以示斯民勸遂卜剛辰遣都  
事尹師彥奉太牢旨酒祀聖人於曲阜闕里使  
者將命詣殿庭設俎豆簠簋具三獻禮一如舊  
式里中父老扶杖圍門墻而觀者如櫛咸舉手  
加額曰不圖今日復見聖朝威儀皆感泣數行  
下使者歸復命公喜曰吾幼而敦詩書說禮樂  
長而行所知遵所聞至于今日奉天子詔提王

者師拯生民命斯聖人之教也其脩祀典固宜於是

至元二十一年十月 蘭陽孫翥爲之記

### 尼山孔子像記

設像事神非古也其尸禮旣廢之後乎漢文翁立學官成都蜀有文翁石室設孔子坐像其坐斂蹠向後屈膝當前上古以來君臣及七十二弟子繪事兩旁晉王右軍嘗簡蜀守寫倣之有宋嘉祐中王公素摹爲禮殿闢此像之最古者然皆漢衣冠也唐敬宗守制鄒邑遷學舍于城西

建孔子廟時孔顏子孟三氏子孫教榜張顛習子禮者也因問立像之制曰古人席地而坐高臺隆屣旣已失之冕服之度傳訛甚矣闕里行教像顏子從後者顧愷之筆杏壇小影像吳道子筆及近司寇像皆漢晉衣冠耳禮記儒行篇孔子自言少居魯衣逢掖之衣長居宋冠章甫之冠此孔子衣冠也縫掖深衣是已章甫玄冠是已深衣以布身二幅各四尺四寸袂二幅亦四尺四寸殺其袂而圓至袪爲尺有二寸不殊裳其裳十二幅兩傍殺之領緣袪皆緇束以革帶

左右佩有殺無鞞加以大帶紐約用組黑履於  
是做文翁石室作石像章甫縫掖危坐謂孔子  
毓秀尼山奉而居之坤靈洞乃問冕之制則曰  
散在禮經注疏雖互有得失衆而求之可以考  
見顧讀者不之究耳古者冕服有等大要冕弁  
冠三者而已曰冕者太古謂之緇布冠加絃緹  
纁旂則後王之彌飾也其冠古以布而緇之周  
以純其下爲武謂圍首者武上有冠以緇爲之  
屈加於武內畢有襃積向左或十二或九或七  
或五或三武質以衡衡之兩旁有纁纁繫以纁  
懸以統冠之上加覆謂之緹緹旁有組貫之於  
衡前後垂纁旂加冠襃積之數旂以五十二者  
五王玄黃朱白蒼質以五采纁如王之色九旂  
七旂三王朱白蒼三采五旂三旂二王朱綠二  
采纁如王之色固以絃絃繚於衡之左端加之  
緹上復繚於衡之右端繞於頤下再繚而結之  
結者謂之纁垂者謂之綏絃天子朱卿大夫青  
士緇而加以采次者弁以皮韋皆右會會謂縫  
飾會以玉如冕旒之數會之內以象爲之邛無  
襃積貫武以筭統纁纁皆冕之制次者冠玄



冠是也委貌章甫其名雖殊其制相類如緇布  
綏等衰如弁之制此其首服也古人衣身皆四  
尺四寸天子長袂袂八尺八寸公侯後袂袂六  
尺六寸服冕者衣以絲其色玄冕十二旒者衣  
十二章日月星辰山龍華蟲作繪宗彝藻火粉  
米黼黻絺繡華蟲以上在衣宗彝以下在裳日  
在左月在右星辰宜畫北極在北山之性止而  
靜龍布升降華蟲雉也宗彝二其一畫虎其一  
畫雌雉如猴形以尾卷物內鼻中火之性圜而  
不銳白與黑謂之黼如斧形黑與青謂之黻如  
兩已相背九章去日月星辰而登龍於山龍有  
降無升登藻於衣七章自華蟲以下登火五章  
藻火粉米在衣裳黼黻三章衣唯粉米而裳黼  
黻七幅前三後四兩旁無殺縫其色纁束以革  
帶帶之前垂鞞鞞如裳之色紕以爵韋紕謂兩  
遍純以素純謂下緣十二章飾以龍九章火七  
章山五章三章無飾左右佩玉有珩璜瑋瑀衝  
牙貫以纁珠籥以綬綬有等上加大帶帶以素  
十二章朱裏終辟首卑九章素帶終卑七章五  
章素帶辟垂三章率下辟帶紐約用組赤舄服

弁者祭服以緇謂之紂衣裳帶鞞佩綬如冕之制朝服以布天子則素積祭服朝服長袂侈袂如冕而服弁者通服玄端焉端身四尺四寸袂亦四尺四寸故有端之名冠服則玄端上士玄裳中士黃裳下士雜裳前玄後黃曰雜有鞞如裳之色帶佩有等黑屨玄冠深衣可也圭薦之而已既薦則共首非若後世執笏然笏則搢於帶間亦不執也執笏自後周始非古也既又作子思像于中庸精舍孟子像于孟子墓廬以鄉魯聖人之居四方於此觀禮故刻之尼山以俟好禮者有取焉

至元三十一年壬申日南至從仕郎鄒縣尹兼管本縣諸軍粵魯兼勸農事東陽司居敬記

### 重建至聖文宣王廟碑

聖上嗣服之初祗述祖考之成訓興學養士嚴祀先聖自曲阜始制詔若曰孔子之道垂憲萬世有國家者所當崇奉中外聞之咸曰大哉王言拭目太平文明之治粵明年元貞改元先聖五十三代孫密州尹治入朝璽書錫命中議大夫襲封衍聖公月俸百千秩視四品孔氏世爵

弗傳者久至是乃復申命有司制考辟雍作廟  
於京師由是四方嚮風崇建廟學惟恐居後闕  
里祠宇燬於金季之亂閣號奎文若大中門闕  
存者無幾右轄嚴公忠濟保魯嘗假清臺頒曆  
錢佐營繕之費歲戊申始復鄆國後寢以寓先  
聖顏孟十哲像至元丁卯衍聖公治尹聞阜主  
祀事將圖起廢奎文杏壇齋廳黌舍卽其舊而  
新之禮殿則未遑也國初封建宗室書濟堯單  
三州爲魯國大長公主駙馬濟寧王分地置濟  
寧總管府屬縣十六曲阜其一也濟寧守臣按  
檀不華恭承認旨會府尹僚佐鄉長者謀曰方  
今聖天子守成尚文此鄉風化之源禮義之所  
從出爲守臣者敢不對揚休命以廟役爲任首  
出帛弊萬緡衆翕然助之傭工顧力市木於河  
輦石於山掄材於野采棟樑楠楹礎之屬悉具  
又得泗水渠堰積石數百石望稱是露階錯砌  
咸足用焉郡政之暇躬爲督視甄陶鍛冶丹牘  
髹漆以至工師廩積各有司存經始於大德二  
年之春屬歲侵中止歲事於五年之秋不期月  
而告成殿臺重簷凡以層基繚以脩廊大成有

門記侑諸賢有所泗沂二公有位黼座既遷更  
塑鄆國像於後寢締構堅貞規模壯麗大小以  
楹計者百二十有六費用以繕計者十萬有奇  
落成之日遠近助祭者衣冠輻輳衆庶瞻顙于  
禩祖庭頓還舊觀於是衍聖公治遣其子曲阜  
令思誠奉表以聞且以廟碑爲請會博選胄子  
入學擢思誠國子監丞持勅中書賜田五千畝  
以供粢盛復戶二十八以應洒掃仍下翰林書  
其事于石臣復承命踧踖既述典造始末竊惟  
聖人之道與天地同聖人之祀與天地無極堯  
舜湯文之君不作而道在洙泗立言垂教推明  
堯舜湯文致治之由模範百王仁及天下後世  
願治之主莫不宗之廟貌相望達于四海聖人  
之道固無係於祀禮之隆殺夫尊其道而恭其  
祀蓋治古之恒規王政之所先也洪惟聖元神  
武造邦天兵傳汴戎事方殷不忘存敬先聖之  
祀詔求五十一代衍聖公元措歸魯哀集太常  
禮樂於兵燼之餘燕翼之謀肇於此矣世祖聖  
德神功文武皇帝仁霑義浴九域混同文物煥  
然可觀內立國學外置郡邑學官而於先聖之

後尤所注意遴選師儒訓迪作成需賢以嗣封  
爵茲志未究皇上纘而成之故自紹膺景命以  
敦化勵俗爲先務至於博施濟衆敷文來遠哀  
矜庶獄惠鮮鰥寡由天縱之聖見於設施皆堯  
舜湯文之舉揆諸聖經之言若合符契用能張  
皇教本光昭先業以致魯國臣民思樂泮水如  
附靈臺子來之衆至矣哉觀文化下必世後仁  
之效豈特振曜一時寔宗社無疆之福也銘曰  
道之大原寔出於天天何言哉乃以聖傳傳道  
維何唐虞三代儀範百王萬世永賴聖人之功  
與天比隆聖人之祀番之無窮皇元肇基撥亂  
右武天兵趨汴周禮在魯烝哉世皇載整乾綱  
始定終綏遂臣萬方肅肅魯庭嗣封有典德音  
孔昭聖謨丕顯王者之作必世後仁繼序不忘  
成於孝孫適觀厥成是訓是則思樂泮水作廟  
翼翼如矢斯棘如聲斯飛籩豆靜嘉陟降有儀  
祀事孔嚴世爵以延酒掃有尸粢盛有田聖政  
聿新希蹤治古僉曰皇明登三成五泰山巖巖  
聖祀綿綿與國無疆於萬斯年  
勅翰林學士承旨正奉大夫知制誥兼脩國史

臣閻復撰

闕里宅廟落成後碑

玄聖之德大如天地昭如日月蕩蕩乎無能名  
焉皜皜乎不可尚已歷代有國之君崇尚其教  
廟而祀之幾徧天下闕里聖人鄉邑自漢祖過  
魯祀以太牢出是以降其廟制因仍損益見於  
圖志可考者在宋金爲最盛貞祐一燬久而未  
復我元列聖尊道勸學之心未嘗不切特以志  
在此一租於金革有所未暇逮大德守成始克  
成二祀三宗之盛意殿而廡之位而像之沈沈  
奕奕有恤有嚴數百年闕規偉觀一旦而復視  
舊益加隆焉而又紹衍聖世享之封主四仲家  
庭之祀無以供粢盛也則胙之土無以給涓潔  
也則復其尸塋林則樵採有禁子孫則教道有  
師詔旨諄復訓諭切至且命翰林書之石荷歟  
偉哉初太中大夫監蒞濟寧路總管府事按檀  
不華以魯居治境乃懿戚封邑祗承朝廷德意  
開論僚屬勉助士庶光已而爲之倡前役而爲  
之備國無費財民不知勞卒成一代之盛事總  
管馬嘉議昭寶左右之旣年役狀其本末遣經

歷張格知兗州馬奉訓禮請記其成竊嘗一拜  
林廟伏讀漢隸數碑見其請立百戶卒史典領  
禮器及用辟雍禮出王家錢給大酒直則乙瑛  
也選試孔鮒補卒史則後相平也韓勅則脩飾  
宅廟造立禮器孔晨則乞依社稷出王家穀以  
供春秋禋祀是數人者皆東都前後魯相以所  
請上之三公府公府以聞乃可其請事比魯相  
發之數人者名不著見於史徒以上章爲聖廟  
有所陳請勒名貞石閱世千數百年至于今不  
朽矧太中生當盛代遵奉明詔振舉隆典潤色

太平茲特隆化羨俗勇於爲善之一端耳若其  
表率一道廉勤奉公恤隱除害善政及民者尚  
多自前代載名信史傳休無窮豈東都魯相所可  
並日而談哉

大德十一年冬十月東平晚進李謙拜手書

手植一檜刻像記

天地不而復泰日月晦而復明聖人之道厄而  
復亨六籍厄於秦至漢而復興正道厄於晉宋  
齊梁陳兩之間至唐而復興此自然之理也貞  
祐初虜寇犯曲阜焚孔庭檜聖道之廢興固不

係於一木之存亡新宮火三日哭重先祖之居也况聖而即之手植乎衍聖公收其煨燼之餘李侯刻而為之知尊事矣若夫茂其德封而植之是聖道在也豈特一木哉

正大三年六月晦趙秉文謹記

### 祭孔子廟碑

延祐庚申之春聖天子初登大寶肇脩禮類遣說書王存義詣魯以太牢祀孔子手香加額以授之命中書齋白金百五十兩錦綺雜綵衣裏五十二端翰林撰祝文三

式供具以太中大夫濟寧

有司羅儀衛清道肅廷諸儒禮服前導士民觀

者溢郭塞衢五月甲申至曲阜越三日丁亥存

義若濟寧路總管珍孔子五十四世孫襲封衍

聖公思晦恪行祀事禮成三獻儀物交至神人

以和翼口口不集孔顏孟子孫以享神餼耄艾衍

如也前日疋方以亢旱為憂迨俎豆甫陳甘雨沛

作識者明皇上誠敬所致欽惟聖天子嗣體守

文於齊以之初爰稽祀典以孔子為天下先於

是中外切忻以為繼今以往我國家聲教之敷



文物之興可想見其愈盛矣猶歟偉哉古帝王  
之祀孔子者自漢高祖始然當時禮意未必若  
今日之備也今朝廷優禮孔族亦至矣復之世  
世無所與公其宗子以奉祀事官其族之賢者  
尹曲阜以治之推其尊者爲家長以領家務勅  
名儒以教授其子孫權其秀異者不次而爵祿  
之鳴呼孔族之蒙厚恩如此可不思所以圖報  
哉存我字之宜純謹文雅於將敬爲尤稱珍字  
寶臣而但悌君子也間者數爲元用言孔子廟之  
祀亦昭代令典也請文諸氓以垂不朽元用辭

弗獲復命遂爲紀其實而系之以詩曰

於穆天皇思隆至治孔道是崇首嚴祀事發使  
來享恭敬之將金帛交錯有饒其芳儀備而恪  
耿其煌煌誠格神佑風動四方大哉夫子億代  
所尊屈于衰周伸于我元列聖相承益脩文德  
穆穆當天明明在職聲教誕敷惟道是則於萬  
斯年會其有極

朝散大夫尚書省右司員外郎曹元用撰

代祀闕里孔子廟碑

皇帝嗣大歷服命翰林臣元用捧白金百五十

兩弊帛二十有六純祭爾里孔子廟祀畢嘉議大夫龔  
封衍聖公思晦奉直大夫濟寧路判官董昭請文諸貞  
珉以紀昭代盛事元用竊謂孔子之教非帝王之政不  
能及遠帝王之政非孔子之教不能善俗教不能及遠  
無損於道政不能善俗必危其國由漢以來有天下者  
消禍亂於未萌寧邦家於悠久以孔子仁義編常之訓  
浹乎人心忠孝迭發默有以相之也是故歷代  
所以崇奉其教者至漢魏爲孔子廟置百戶卒  
史掌禮器出王家錢以祭旣又給戶錫同公侯  
其宗子以主祀事至唐開元則袞冕而玉之令

天下州縣皆立學漢高帝明帝章帝宋真宗皆  
親至其廟極誠敬以行薦裸禮真知所本哉若  
始皇非先聖燔詩書恣行暴虐適足以速其滅  
亡而已皇元以馬上定天下國初卽誕敷文教  
遣使函香詣曲阜祀孔子給酒掃戶百令襲封  
衍聖公仍其舊歲割山東諸郡曆日銀以葺廟  
宇詔天下取法孔子興學作人武宗皇帝登極  
肇遣詞臣函香如國初故事仍齎銀幣以將其  
意厥後列聖相承踵以爲則欽惟皇上以聰明  
文武之資中興大業闡人文以化天下今者闕

聖之祀亦所以丕承先志也元用以天曆二年  
三月甲申將命至竟衍聖公率孔顏孟三氏若  
諸生郊迓董濟寧暨厥僚屬具儀衛前導至祀  
所越三日丁亥齋沐備三獻禮薦禘如儀祝史  
致告諸執事各揚其職牲臚酒冽神人胥饗既  
乃大享與祭者於廟之東廳霈澤汪濊恩意普  
洽咸極歡而罷嗚呼自昔帝王致崇極於孔子  
者多矣然皆未若我朝之盛天子卽位之初輒  
遣官致祭儀物交臻夔與他祠異皇乎休哉此  
亘古所未有也所尚如是其能化行俗美措四  
海於隆平延弘祚於萬斯年也宜矣歟儻者起  
腐敗者墜漶漫者飾煥然一復舊觀若之公者  
可謂祗承朝廷之德意也惟夫子以神道設教  
有天下國家者咸取以爲法歷代崇奉未有若  
國家尊尚之至邇者衍聖公請依前代故事起  
圍墻四隅建樓倣王公之制奎章閣以聞天子  
允焉省部以徐公勤敏復檄公監督功之成可  
指日而待將有大書深刻頌其美於無窮者而  
此特紀其事之一端耳夫紀事尚實不尚文故  
略其文而且書焉

至順三年五月吉日孔顏孟三氏子孫教授張  
瀚記

代祀闕里孔子廟碑

聖天子嗣登大寶當至元乙亥之初令翰林臣  
思誠奉祝文函香詣曲阜以太牢代祀孔子廟  
從集賢請遵舊典也思誠將命以閏十二月壬  
辰抵兗州預敕有司蠲日庀事丁未濟寧路守  
土臣張仲仁兗州判劉彬暨曲阜縣尹宣聖五  
十五代孫克欽孔顏孟三氏子孫教授趙惟賢  
率聖族清道肅儀朝服郊御魯諸生儒服前導  
齊於祀所翼日贊明愷行祀事思誠若仲仁若  
彬咸服法服攝三獻官克欽若惟賢等咸服朝  
服司分奠諸生駿奔走各虔乃職牲臚酒冽禮  
備樂饌祝史致詞洋洋乎神明之格而歆也竣  
事之旦大享神餽于燕申堂聖族陪位與祭者  
咸在少長齒坐迭起行酒其叙秩如庖翟均隸  
亦既醉飽其樂衍如燕畢仲仁等請曰代祀有  
記所以紀昭代之盛典不可闕也竊惟自漢以  
來崇奉先聖至我朝而極盛加號大成改封聖  
考爲啓聖王聖妣若聖妻並爲王夫人遣使奉

送制命于闕里祭以太牢其禮隆矣太皇太后  
尋亦遣使奉香幣致祭並刻諸石矧茲盛禮可  
無紀乎思誠謹述其事之本末系以詩其詩曰  
有聖皇元奄有萬方列聖相承文教誕揚皇明  
嗣服繼叙不志眷言曲阜素王之鄉爰命詞臣  
冊祝函籒載臨闕里爛其煌煌蠲辰歲事惟言  
惟良牲牢肥腍黍稷芬芳禮備樂齎神人悅康  
於赫尼父軌範百王允迪允酬宗社隆昌或巽  
或皆九有以亡穆穆天子茲率厥常盛禮斯舉  
敬誠是將既欽既敷惠澤其滂矢詩頌美億載

休光

翰林脩撰承直郎同知制誥兼國史院編脩官  
臣王思誠撰

創建洙泗書院記

至元後戊寅八月益都路宣慰東野潛社稷署  
令蔡思中簿鄧昌壽偕五十三代孫文學孔澈  
具篚幣詣元隆曰世尹聖裔也以斯道之故聘  
子從游也又謂洙泗故基爲民所有化爲禾黍  
過者興嘆出貲市田買材經營量度禮殿講堂  
門廡齋庖闕時告成將勒諸石以紀歲月特徵

文於子子母多讓元隆筆力孱弱辭不獲命遂  
記之夫天地之運有通復日月之明有晝夜聖  
人之道有否泰非聖天子則聖人之道不行微  
吾夫子則帝王之道不明欽惟世祖皇帝平定  
區宇列聖祖武斯道之大明以行焉迺詔天下  
郡縣廟祀夫子備王者禮樂惟祖庭爲盛洙泗  
遺址斯文所基歷代未復荒頓幾二千載矣大  
且舉之實我皇元闡文運隆治化之盛典也昔  
聖祖之講誨于是也刪詩訂書贊易道脩春秋  
道統之傳以祖述憲章上胥下龍龔皆鈞覆載之  
體寒暑之時服食之功三綱五常賴以不墜而  
禮樂教化以之而可度典章文物以之而可興  
脩已治人之德以之而可成洪纖高下各遂其  
性形容夫性與天道之妙以相授受成就後學  
施諸永世傳諸方冊爲天地立心爲生民立命  
爲萬世開太平奚止土木之功爲哉然尹之區  
區者豈特其繼述之孝將以竟國家典禮之至  
尊豈斯道之極誠臣子之至願也庸思其先自  
有國之初其祖元用率孔族招庶姓以降尋以  
軍功歿於王事之全魯沿僉功祖庭其父思誠

拜師命於成均四君子者奕世象賢皆不暇及  
今能之匪尹之所能爲也天也天朝文明聖治  
之化被四表格上下洽之無窮故千古廢墜一  
時告新我朝所以冠五帝冕三王之盛者於是  
乎在方其經始僉肅政廉訪司事楊文書訥按  
部至說以予之尹之爲力也易尹名克欽字敬  
夫考之世譜宣聖五十五代孫也謹記

御賜尚醞釋奠記

至元五年後已卯正月皇帝田于柳林以上丁  
在邇允御史臺奏因宣聖五十四代孫監宗御  
史臣思立出上尊酒釋奠于闕里遣御史從事  
臣高元肅駟政之禮竟曲阜縣尹權祀事臣孔  
克欽言于宗黨曰茲誠希有之盛典不識諸石  
罔以昭後于是其宗人前湖廣行中書省都事  
臣思迪等屬臣宜記之宜延祐初科進士且嘗  
助教國子掄揚聖德職也遂不敢辭而諾之曰  
吾夫子在魯哀公雖誅之而未極其尊漢高帝  
雖祀之而未盡其禮後代褒崇封爵之未悉其  
道詎若皇元累頒明詔旣於至聖文宣王上加  
封以大成復於二丁永享以太牢重以香帛白

金之錫帝心再三寅奉尊隆禮意淵博邁越古  
昔遠矣今憲臺擴弘縉典霑光祿之天釀以備  
祖庭禮酌豈惟孔氏子孫有光實天下儒服之  
士舉有光也廼拜手稽首樂爲之書

朝散大夫濟南路棣州尹兼管本州諸軍粵魯  
勸農事臣梁宜謹記

### 勅脩曲阜宣聖廟碑

今上皇帝臨御之七年歲在己卯春三月戊辰  
御史大夫臣別里怯不花臣脫脫等言天曆二  
年十月文宗皇帝在御奎章閣學士院臣沙臘

班等列奏曲阜宣聖廟自漢唐宋金凡有墮廢  
必奉勅繕脩功成則勒之石衍聖公以舊廟將  
壞飭書奉圖屬學士院以聞時文宗覽圖諭旨  
省臣趣脩之事竣則立碑以詔方來今新廟旣  
完而成績未紀懼無以稱塞先詔御史章上臣  
等僉議請勅翰林侍講學士臣玄爲文奎章閣  
學士院大學士臣巉巉爲書前侍御史臣起巖  
爲篆以臺儲中統楮幣二萬五千緡爲立石之  
費制皆允廼命宣聖五十四代孫御史思立傳  
勅臣玄俾書其事玄拜手稽首言曰天佑下民



作之君作之師昔者伏羲神農黃帝堯舜禹湯  
文武數聖人者作君師之道備於一人用能左  
右上帝克綏厥猷吾夫子出天獨異以師道凡  
天叙天秩天命天討之事夫子明禮樂刪詩定  
書贊易道脩春秋而品節之以爲百王法於後  
世儀封人曰天將以夫子爲木鐸子貢曰固天  
縱之將聖夫子自論斯文之任上以屬於天下  
以屬於已使得位設教卽前數聖人所爲繼天  
立極者也是故天欲興一代之治則吾夫子之  
道必大昭明於時歷千萬世如出一轍皇元龍

興朔方太祖皇帝聖智天授經營四方太宗皇  
帝平金初年歲在丁酉首詔孔元措襲封衍聖  
公復孔顏孟三氏子孫世世無所與增給廟戶  
皆復其家是歲曆日銀諸路以其半益都東平  
以其全給脩宣聖廟尋詔元措括金人禮樂官  
師及前代典冊辭章鍾磬等器以數來上仍命  
於曲阜閱習禮樂以備時用又詔諸路設學遣  
官分道程試儒業世祖皇帝初在藩邸多士景  
從作其卽位大召名儒開廣庠序命御史臺以  
勉勵校官國子監學以訓誨胄子大司農以興

舉社學興文署以板行海內書籍提舉教授以  
主領外路儒生宿衛子弟咸遣入學輔弼大臣  
居多俊乂內庭獻納能明夫子之道者言必稱  
旨 在位三十五年之間取士之法興學之條日  
討論之規模益弘遠矣 裕宗皇帝時在東宮贊  
成崇儒之美 成宗皇帝克繩祖武銳意文治踐  
祚之初詔曰孔子之道垂憲萬世有國家者所  
當崇奉既而作新國學增廣賢舍數百區 曹子  
教養之法始備 武宗皇帝燭典制作加號孔子  
爲大成至聖文宣王遣使闕里祀以太牢 仁宗  
皇帝述世祖之事弘列聖之規尊五經黜百家  
登崇俊良以振治具我朝用儒於斯爲盛 英宗  
皇帝鋪張鉅典廓開彌文明宗皇帝凝情經史  
愛禮儒士文宗皇帝緝熙聖學加號宣聖皇考  
爲啓聖王 皇妣爲啓聖王夫人改鑄衍聖公三  
品印章賜山東鹽運司歲課及江西浙江兩省  
學田歲入中統楮幣三十一萬四千四百緡 昇  
濟寧路俾脩曲阜廟庭文宗賓天太皇太后有  
旨董其成功今上皇帝大纘丕圖儒學之詔方  
頒闕里之役 鼎盛山東憲司洎濟寧總管張仲

仁曲阜縣尹孔克欽蒞事共恪以元統一年四月十一日鳩工至元二年十月初吉落成宮室之壯以寧神棲樓閣之崇以度寶訓周垣繚廡重門層觀卅碧黝聖制侔王居申命詞臣楊厲丕績於是內聖外王之道君治師教之誼大備於今時猗歎盛哉皇元有國百餘年以來繕脩宣聖廟者再丁酉之初以開同文之運天曆之際以彰承平之風東冒出日西踰崑崙南盡火維北際冰天聖道王化廣大悠久相爲無窮端本實在茲矣臣玄奉命撰述有詔御史思立奉

祝幣牲齊馳驛往祭告厥成功臣玄既序願末請系以詩詞曰

厥初生民倥傯蒙三五繼作大道爲公風氣日開民習日漓道統絕續孰綱孰維少昊之墟東魯之士挺生聖人以淑萬古聖人旣生代天以言立我民極與天並存惟皇建極尊用其道百王軌範予以順考三光以全寒暑以平俊民用章時乃迓衡天子垂拱大臣承弼體信達順鳳麟時出皇元之興厚集大命太宗興文首法元聖世祖龍飛髦士屬心恢弘文治濬發德音

世及三紀仁漸義摩建學立師善人用多溫文  
裕宗祇荷論燕成廟崇儒邁若天顯武皇英毅  
入繼離明載崇徽號玉振金聲濟哲仁皇文德  
繼世誕揚祖訓籲後尊帝爰及英宗禮樂孔殷  
穆穆明考美德懿聞文宗續緒聖聖克肖廼開  
奎府廼飭孔廟今上嗣世丕式大猷勒石新廟  
宏賈鴻休新廟奕奕泰山具瞻衡統紘經衮衣  
澹澹維宋維金遺刻具在於赫我元冠冕百代  
我元聲教極彼堪輿豐舍萬里誦詩讀書惟茲  
曲阜斯道之壺如水有源如木有本皇監在上  
執我道樞相我熙朝躋民唐虞惟言臺臣職是  
風紀昭宣獻謨是用歸美聖道王化如日麗天  
儒臣詠歌億載萬年

至元己卯翰林侍講學士通奉大夫知制誥同  
脩國史兼國子祭酒臣歐陽玄奉救撰

尼山書院碑銘

周靈王二十年陬人顏氏禱於尼丘山二十有  
一年孔子生五代周顯德中魯守趙侯作新廟  
宋慶曆中嗣文宣公宗愿大建廟學有元至順  
三年衍聖公思晦請復尼山廟禮部尚書康里

公巖白于中書至元一年左丞王公懋德議設尼  
山書院以彭璠爲山長三年冬十有一月廉訪  
僉事楊公文書訥分司至于兗州以璠言用前  
濟寧總管張公仁舉使同知滕州事郝君寶寶  
聞董其後十有二月分司至于鄒楊公及郝君  
相後於尼山滕鄒大夫士來致賀曠故魯武惠  
公宅於東平四年春正月璠如東平二月東平  
總管王公主敬致材於白馬河三月壬子庀工  
作大成殿大成門神厨作明倫堂東齋西齋東  
塾西塾作毓聖侯廟觀川亭秋八月告成宣

寶問汝惟貳咸曰汝材作而行之楊公曰嗟爾  
大夫寶寶問翦荆棘除埃壤以底厥舊惟汝功  
選吏士庀工徒固基宇嚴廟貌惟汝任弗疲民  
弗淹時弗糜財惟汝能我聞曰材惟舊易於新  
力於舟易於車惟汝其念之郝君曰都郝君曰  
嗟爾鄒尹張士謙悉乃心以致役事以峙餼糧  
以集車牛以利噐用鄒尹呂克中爾惟克勤其  
相鳩材鄒士馬亨李儼李元彬考制度以底法  
鄒士王從義其司入州史石居仁其司出鄒史  
吳守中胡德秀其司程必謹必節毋致怠忽東

平公曰昔在魯共王壞聖人宅用廣廡宮乃今以魯公  
宅爰作聖宇於乎休哉予璿暨滕人張顯宗薛宗冕元  
榮惟茲宇在宋于汴惟鄭恩宅在元于鄆惟嚴實宅今  
茲歲在戊寅予其撤有文在稅曰戊年破於平徵哉公乎  
致汝材毋撓材毋黷民敬之哉羅括公曰惟天  
生聖惟皇崇聖孰敢不欽若官若吏若士敢有  
不祇廡事國則有常刑敢有朋酌酒致鄭聲博  
奕笑噉以黷清廟時則有大罰敢有讎使介舍  
羈旅國則有常罰敢有踰垣墻毀宮廟牧牛羊  
竊薪芻時則有常刑趙公曰惟天生聖惟聖垂  
憲惟師典教惟士祗學報本于茲有翼有嚴若  
師若士非經何教非德何學一乃心勅乃身以  
明天倫以究人治報天尊聖以衍無疆之休或  
敢不恭則有常憲任公曰粵惟尼山在防鄆之  
間孔氏自宋之魯防叔居防廡墓營焉叔梁宰  
鄆五父爰殯防惟西北鄆惟其西南稽諸太史  
尼丘之禱用名若宇於是爲信昔在宋氏宏大  
廡宇以媿闕里洪惟有元式新大之惟有無疆  
之休必有無疆之聞託之金石伯敷甫其作銘  
陳繹曾拜手稽首固辭乃言曰惟天惟地惟載

神氣神氣之合其大無外其小無內昆侖旁薄  
會于岱宗南融鳧山太昊開天東逝尼山聖集  
大成支流于嶧是生亞聖終始道統咸疆于鄒  
於乎盛哉粵昔聖人作法一代惟吾夫子垂憲  
萬世亘宇綿宙罔不尊親於乎大哉其在祀典  
惟有道德祭于瞽宗惟山川出雲雨爰潤萬物  
時則旅之矧惟聖人澤被萬世毓茲尼山新大  
廟宮於乎時哉乃作銘詩六章章八句辭曰  
昔在高辛有娥方將爰禱高禱玄鳥致祥立我  
商人篤生玄王乃明人倫敷教虞唐降茲有

周頹字鄒人尼山是祈夢維綬麟篤生素王乃  
聖乃神敷教萬世誕明天倫岱宗綿延尼山  
之毓坤靈是竅有圩其顛降神毓聖厥功竟天  
何千萬年不崩不騫乃剔故蹤乃作新宮桴  
材自鄒輦石于東庶士子來百日其攻聿飛斯  
翬聿見斯龍新宮既作尼山嶽嶽闕里泗林  
鴻光昭灼子衿青青于何其樂于何其樂爾效  
爾學尼山有杞鄒田有芑胡不作人樂只君  
子樂只君子爲天子使於萬斯年錫爾純祉  
至元五年歲在己卯五月吉日國子助教陳繹

曾撰

祀曲阜宣聖廟

至元五年三月監察御史言曲阜縣宣聖廟繕  
完訖功國家宜錫楮幣樹碑石勅儒臣制文辭  
紀欽崇之蹟於久遠具疏以聞制可賜中統二  
萬五千緡爲立碑之資七月又言宣聖五十四  
代孫思立今任監察御史請特賜香酒翰林撰  
祝文命思立馳驛致祭以成其事斯文幸甚時  
天子北幸上京移文分臺章奏益以可其請遂署  
檄下山東道以曲阜縣爲廉訪司所按臨分司  
所巡歷居則總督至則共祭庶體敬共之意八  
月二十三日思立行祭禮山東廉訪副使伯嘉  
閻亞之同知濟寧路事衆家奴終之猗歟休哉  
實熙朝之盛典也惟吾夫子以天縱之聖出神  
明之胄雖不位乎君師脩道立教如天地日月  
然詔後世而垂無窮者大美或以謂則象乾坤  
爲漢制作不亦陋乎况鄉邑其所生子孫其所  
承敬慕之者宜何如哉我國家將以振厲風教  
扶植綱常立人道之極表文治之盛孰不觀感  
于茲謹識其事如石俾來者有徵



至元後已卯歲秋吉中議大夫御史臺都事太原王守誠記

釋奠宣聖廟記

皇帝總宏綱新文治任賢使能發政施仁率繇成憲迺至元六年青龍庚辰夏五月幸上都百官分署以從七月庚申太師中書右丞相監脩國史知經筵事臣馬扎兒合中書平章政事知經筵事臣孛羅臣汪家奴臣沙蠟班中書參知政事知經筵事臣阿魯魯參議中書省事兼經筵祭贊官臣孛羅臣何延蘭中書左司員外郎兼經筵贊官臣倍良哈台左司都事兼經筵祭贊官臣蠻子臣孔思立右司都事兼經筵祭贊官臣蠻子等奏言曲阜林廟宣聖所生之地非他廟學比今議遣翰林脩撰臣周伯琦馳驛奉香酒釋奠仲秋上丁甚稱崇報之意臣謹以聞制曰可越四日癸亥上御龍光殿太府進香上手致敬大官出上尊四伯琦欽承以行八月乙酉至曲阜縣明日奉香酒至宣聖廟又明日丁亥祀用太牢奏大成樂行三獻禮伯琦初獻同知濟寧路事參家奴亞獻兗州知州馬從義終獻

皆冠進賢冠被法服時宣聖五十五代孫曲阜  
縣尹克欽主祀事適秋亢旱省牲之夕陰雲四  
合甘澤沛若將享之晨天氣清朗月星明踴俎  
登豆列禮備樂和祝官致告執事具虔薦禋興  
頌悉中儀式竣事合孔顏孟三氏宗族師弟子  
員暨郡邑官僚燕于東室咸北向載拜序飲上  
尊酒盡歡而罷竊惟吾夫子之道悠久無疆與  
天地同大日月並明故覆載無所不至照臨無  
所不及雖生不逢辰用不得位然明六藝作春  
秋以傳道統以建人極使藝倫叙品物亨政教  
明千萬世如一日者蓋自生民以來未有能尚  
之者矣是故有國有家者必以建學立師爲先  
大用其道則大治小用其道則小康其在方策  
粲然可考惟闕里爲聖人鄉國光嶽之靈冲和  
攸萃廟貌林墓在焉宗姓支裔守焉歷代報德  
報功之慎且重也宜矣皇元自受命以來廣黌  
舍重教育世封其大宗爲衍聖公以奉祀事世  
任其小宗爲曲阜縣尹以治其地置守廟戶復  
其家世祖成宗重泮宮廟武宗加號大成仁廟  
以來卽位必遣使祭告厚有賜頒今上皇帝踐

祚八年之中凡四遣使始命文臣以卽位告又命五十四代孫監察御史思立致祭以樹碑告且頒中統鈔二萬五千貫爲樹碑之貲而去年春及今年秋又兩致香酒釋奠上下其欽崇美報之典於斯爲盛洙泗之間歲承天寵薄海內外咸知所向夫子之道將大用於今日聖君賢相都俞吁咈登三邁五黎民於變時雍顧不在茲乎猶歟隆哉伯琦弱冠掌侍先君謁拜二十有三年矣乃今獲奉德音誕舉盛典何幸如之謹識其歲月以刻諸廟門之石

至元六年八月戊子翰林脩撰承務郎同知制誥兼國史院編脩官鄒陽周伯琦記并書篆

### 尼山書院記

尼山書院山長臨川金谿彭璠歸自魯以興復書院始末爲言乃爲之次第其事云尼山去曲阜東南六十里今屬滕州鄒縣在滕西百里鄒東六十里其山五峯並峙中峯則所謂尼山啓聖王夫人顏氏所禱而生聖人者也山皆石其巔多蒼栢諸小木皆巨葉霜露旣降絢如渥丹升降各途升之谷草木之葉皆上起降之谷草

木之葉皆下垂無或交戾反刺者其東崖有石  
洞曰坤靈之洞中有聖人石像臨水與顏母山  
對其北則防山卽聖人合葬其父母處也今書  
院在其中前有智源之溪後有中和之壑往者  
奉尼山之神而祀曰齋聖侯其左有夫子之宮  
焉故宋慶曆癸未孔子四十六代孫襲文宣公  
知兗州仙源縣宗愿作新宮廟有夫子之殿有  
夫人之位有講堂有學舍有祭田自是歷宋金  
至于今蓋三百餘年矣宮不知何年廢我國家  
奄有中夏尚崇孔子之道歲月寢久典禮斯備

至順三年歲壬申五十 四代孫襲封衍聖公恩  
聯川林廟管勾簡實理 言請復尼山祠廟置官  
師奉祠因薦璠可用事 聞中書送禮部議奎章  
閣大學士康理公嚙時 爲尚書力言其事當行  
議上至元二年丙子中 書左丞王公懋德率同  
列執政者白丞相置尼 山書院以璠爲山長三  
年六月至官祓舍山中 罄竭私橐繼以假貸具  
羊豕爲酒告山之神召 近鄉父老受神賜告以  
興廢之故明日鄉父老 各以其人至遂除荆棘  
撤瓦礫得殿及門之故 基諸舍之所在次第而

見將告諸郡縣而經營之山東東西道蕭政廉  
訪分司寧夏楊公文言訥行部率其吏翟趙郭  
趨茲山留播舍一日顧瞻徘徊以其事爲已任  
命同知滕州事郝寶賢問領之首出俸以爲之  
先而監州李彥博鄒縣令張士謙與郡邑之官  
屬暨大宗子孔克堅壘簡阜令克欽宗族子孫  
凡齊魯之境賢卿大夫士民之好事者大出錢  
而勸成之擇木於山陶甃於野傭僦致遠牽車  
牛服力役連畛載途飲餉相望役大而民不知  
勞又得古殿遺構之成材於魯之故家尤稱巨  
麗不數月而大殿成殿門成龕聖侯之祠成學  
宮在廟之西傲國子監制也作觀川亭於坤靈  
洞之上相傳夫子之在川上蓋在此云繼以塑  
繪聖賢之像成樂器祭器以次第成置弟子員  
以凡民之子弟俊秀者充之皆復其身役廼以  
明年之上丁用太牢致祠告成噫其功可謂敏  
矣夫朝廷定議於上部使者有司宣力於下以  
克有成聖明在上文運宣通於斯可徵焉嗚呼  
古初開物天作尼山太和網緼元氣融結流形  
降神篤生大聖以立二極位天地育萬物與日

月四時貫通於無窮蒙夫徂徠龜蒙至於岱宗  
雨露風霆往作來復前詹後際邈然高深詎可  
測哉運會有時聿奠新宇不日而成豈偶然歟  
璠也得以學官從事於茲日可謂榮矣集老且  
病舊學益落僅克識其梗槩如此若夫播爲聲  
詩歌頌功德式薦明享勒之金石則有待於當  
今儒林之君子也哉

至正二年壬午正月上元日奎章閣侍讀學士  
通奉大夫知制誥兼脩國史知經筵事蜀郡虞  
集撰

致奠曲阜孔子廟記

有元至正二年十月壬戌皇帝御咸英殿勅中  
書具奏卿朋酒命集賢直學士臣郭孝基乘駟  
致奠于曲阜先聖大成至聖文宣王之廟中書  
助祭元贊二千五百緡嗣衍聖公臣克堅爰擇  
十二月丁巳之吉釋奠如章禮成臣孝基等拜  
手稽首謹言皇帝欽崇聖教建宣文之閣崇文  
之監日御經筵講德唐虞辨章三代日夕乾乾  
遜志時敏式惟先聖孔子照垂六籍不覺萬世  
惟聖知聖是用啓自天衷特致殊禮希世盛德

其可泯而弗宣刻之金石光示永久禮寔宜之  
臣孝基聞聖人之道執一常御萬變君君臣臣  
父父子子大綱一正萬目畢舉故曰王者中心  
無爲以守至正人心服於下天理應於上樹之  
風聲東以禮義不動聲色靡然於變協風時雨  
諸福之物因不畢至漢祖致祀天下歸心唐宋  
升祀永錫胤祚用此道也皇帝天縱玄德加以  
聖學垂衣論道天下泰寧心悅神孚獨得淵衷  
有非臣下所能窺測者小臣載筆敬用作銘銘  
曰

皇帝若曰惟天惟聖揚乾之明握坤以正惟禮  
惟樂惟刑惟政文以經緯武以戡定立我邦家  
功斯爲盛皇帝若曰宗文在中乃禘辟雍乃流  
泮宮有序有序八衣攸同巍巍素王籩豆鼓鍾  
於論曲阜曷不加隆皇帝若曰有典有則春秋  
上丁庚子之吉四早厥家常祀不忒誕昭予敬  
致奠惟特予薌予酒于聖之宅皇帝若曰予嗣  
歷服惴惴小心如臨于谷君君臣臣惟聖予福  
于時處處敢忘嘉告聖經是式我祀匪續皇帝  
若曰予聖時欽惟汝臣鄰惟汝士林汝子汝孫

士庶時忱服聖之言精白爾心勤相國家爾王  
爾金

集賢直學士中奉大夫臣郭孝基撰

代祀記

至正八年秋七月二十日上御灤京之水晶殿  
右丞相臣朶兒只左丞相臣太平平章臣教化  
叅政臣孔思立奏官遣宣文閣授經郎臣董立  
以香酒乾羊致祭于曲阜孔子廟制曰可乃手  
香加額致敬久之以授思立出宣旨命臣立涓  
日而行爰以二十八日發程次月二十二日至

止關里二十三日

以撤林墓一十四日具儀二

十五日臣立為初獻

以衍聖公孔克堅為亞獻守

臣濟寧路總管呂

日為終獻知兗州臣劉思誠

等備分奠丑初將事

寅未而畢遂會孔氏族黨

饗辨于齋宮與坐者

五十餘人衣冠威儀抑抑

濟濟足以感懌人心

禮成衍聖公言使者奉天

子明命禮于先聖官

有紀以示後臣立伏惟夫

子之道高明博厚與

天地偕世之三綱正而九

法叙皆其功德之福

斯民也凡有天下國家者

不容後其報我朝列

聖相承右文興化尊崇夫



夫度越前代殊恩優典固已載于信史壽之金石迨于皇上躬行仁義以爲民極日御經筵緝熙聖學宰相文臣又能啓沃以斯道之正其發命遣使夫豈徒然蓋亦答神之貺祈神之祐底世運于唐虞三代之隆也然則凡爲孔氏之後與夫與祭執事于廟者可不體承聖君賢相之美意以沐浴聖化哉

至正八年八月二十九日宣文閣授經郎臣董立撰

尼山大成殿四公配享記

今皇帝至元三年重建尼山書院奎章閣侍書大學士虞公集寔記之未及大完而山長彭璠卒後十有七年鄒縣達魯花赤馬哈麻君增塑顏曾思孟四公配享殿中邑士趙守寬李之質因其同里陝西等處行中書省左右司郎中張君思政來京師屬素爲之述按顏子之脩坐肇於唐太宗貞觀二年冬尚書左僕射房玄齡國子博士朱子奢之所建議也宋神宗元豐七年夏復增孟子侑坐禮部郎中林希之所奏請也度宗咸淳三年春增升曾子子思逮我朝混一

四海且四十年。延祐二年，仁宗皇帝在位崇學，右文御史中丞趙公世延始言：「南北祭禮不宜有異，當升曾思如典故，制曰：『可。』先是四公列坐兩旁，禮部以爲翼承道統，述明聖經，作則萬世以立人，極論德定名列次，配侑東坐，西嚮於禮。爲稱至順二年進封顏爲復聖公，曾爲宗聖公，思爲述聖公，孟爲亞聖公，仍命詞臣爲制書一代之典，可謂備矣。馬哈麻君作邑於聖賢之邦，欽承上意，克脩墜典，其爲政知所先後，從可知矣。禮曰：『有其舉之，莫敢廢也。』君其知禮者哉。雖然，君之爲是舉，蓋有難者。方盜據徐方，力抗至師，鄒之爲縣，密邇斯境，朝廷憂其供給之繁，增設邑長，以君才敏而權用之。軍旅繹騷，君應答靡有凝滯，將士感悅。及徐平撫安，疲疇飛芻輓粟，徭役平允，當此之時，又能汲汲焉以興學明教爲務，是以謂之難也。今年春，君以仲丁藏祀，致齋之夕，夢升禮殿，瞻仰聖師行事之際，迺睹配享未備，惘然久之。首出俸錢爲之倡，僚吏士民相率來助。邑士張敬祖主其出納，曾未數月而工告畢。公德容粹溫，觀者肅敬，蓋啓聖王與

夫人顏氏禱于是山神秀所鍾篤生聖哲繼天  
測靈萬世永賴所以紹斯道之傳發微言之祕  
四公之功終古如一日矣書院之諸生尚考求  
於方策非四公之學不敢學也邑大夫之望於  
諸生者庶其在此可不勉哉

至正十又四年歲在甲午三月戊寅國子監丞  
危素記

### 勅加封啓聖王碑

維至正八年四月上在興聖宮御宣文閣中書  
右丞相臣朶兒只等入奏曰孔子父叔梁紇加  
封啓聖王未有刊述昭示久遠請以中書左丞  
相臣呂思誠爲文出中統鈔五千貫下襲封府  
具攻石之用制若曰可臣思誠承命惶悚大恐  
曠任乃拜手颺言曰惟我國家崇重聖德宣昭  
聖道與王化合并太祖皇帝肇基洪業太宗皇  
帝在潛行釋奠禮祀孔子於日月山世祖龍飛  
車書混一自上大都及天下郡邑立廟學曲  
阜林廟尤加脩崇於是定襲封之嗣餘孔氏一  
人尹曲阜縣恩至渥也成宗皇帝廟於國子監  
武宗皇帝加謚大成於至聖文宣王上仁宗皇

帝詔立碑天曆初制加封啓聖王顏氏曰啓聖  
王夫人曠與也今襲封衍聖公克堅旣追官中  
奉大夫階二品換印章爲銀爲啓聖王碑得請  
聖眷隆厚曷以報稱臣謹按春秋公羊氏穀梁  
氏依經書孔子生左氏隨經書孔子卒史記作  
殷本紀帝嚳妃簡狄生契十三遷而至天乙始  
有天下是爲成湯書契者原其初也微子開國  
亦曰帝乙之長子明其本也孔子世家曰其先  
宋人曰防叔生伯夏言有承也又書鯉以下直  
至漢時復列傳諸弟子七十二人宋儒邵雍曰

天子以四海爲家孔子以萬世爲家殆以是夫  
惟文公朱熹刪定世家序論語前曰魯襄公一  
十二年冬十一月庚子父叔梁紇母顏氏生孔  
子於魯昌平鄉陬邑又曰孔子生鯉字伯魚鯉  
生伋字子思作中庸厥有旨哉夫惟玄鳥之降  
玉筐之覆金行啓運斗光垂精爲五百年之昌  
期千萬世之嘉會者寔由天生顏淵曰仰之彌  
高鑽之彌堅瞻之在前忽焉在後子貢曰立之  
斯立道之斯行綏之斯來動之斯和其生也榮  
其死也哀子思曰仲尼祖述堯舜憲章文武上

律天時下襲水土孟軻曰自生民以來未有盛  
於孔子者也賢於堯舜遠矣太史公曰自天子  
王侯言六藝者折中於夫子可謂至聖矣楊雄  
曰天之道不在仲尼乎王文中子曰大哉乎君  
君臣臣父子子兄兄弟弟夫夫婦婦夫子之  
力也其與太極合德神道並行乎韓愈曰社稷  
以功夫子以德程子謂賢於堯舜者以事功蓋  
金聲王振集群聖之太成寔由天縱若夫尼山  
請禱精誠昭揭而其表相殊異曰似堯曰似湯  
曰似禹曰似子產曰河曰海曰黃帝之形貌也

曰脩而德其以湯之容體也惟此身體以聖  
之所從繩繩誕而聖之所自不在茲乎漢時聖  
顏氏居魯親聖妃并官氏居安樂里後其孫  
發宋時有齊國公之封又有魯國太夫人軍  
夫人之號其爵邑又若不自其子者今茲峻其  
徽章名與情稱百世不能改也於戲盛哉伏惟  
聖人人倫之至也繫周易刪詩書定禮樂垂憲  
萬世師表百王者蔑有加矣獨於春秋曰志在  
焉孝經曰行在焉春秋天子之事也三綱九法  
望於周也故曰如有用我者吾其爲東周乎孝

經開五孝之用自天子至於庶人各有終始其  
曰至德要道其曰天經地義其尊親之心顯親  
之念曾子所謂一貫孟子所謂一本也不然是  
謂悖德悖禮矣洪惟今上皇帝接太祖皇帝世  
祖皇帝之聖緒嗣守列聖以來之成規聖治之  
敷孝治之洽所謂通于神明光于四海者於春  
秋孝經有嘉焉碑之闕里光昭休烈於無窮若  
江漢之濯秋陽之暴皜皜乎不可尚也臣思誠  
頓首誠惶誠恐復獻頌曰

於鑠皇元赫赫明明翕闢乾坤資始資生太祖

肇基風霆流行世祖混一覆載生成列聖嗣服  
時靡有爭今上繼緒品式法程聖治丕顯孝治  
丕平嘉崇孔子禘典鴻名尼山有禱斗光垂精  
表相之異至道之凝曰惟天縱王振金聲孰與  
道生本立以承王爵之崇啓聖之榮義符於情  
名與實徵五父之殯緩乎其行防墓之崩泣然  
涕零志在春秋行在孝經愛親敬長春秋權衡  
尊親顯親五孝重輕今茲有茲誕聖毓鬻子孫  
有衍是服是膺尼山崢嶸泗水不盈蔚彼孔林  
卓彼魯庭有豐斯碑光昭日星同我夫子無忝

所生闡我皇風四海永清

至正十四年夏四月中書左丞相呂思誠撰

代祀闕里記

皇上卽位之三十二年秋七月命皇太子撫軍冀寧以少保中書平章擴廓帖木兒總諸軍庶務依前便宜行事威懷遠洽夷夏晏寧明年二月以皇太子旨遣官特祭先聖闕里中書檄濟寧省預卜純薦牛一羊二豕二越六日青宮手祝齋薌爓之授元禮出涓日而行以二十四日至魯城祀前一日省牲器視滌濯翼日癸丑

丑初肅享于廟禮備三獻牲脯酒泫登降有數質明竣事以神餼享孔氏族人于燕申堂衍聖公謂禮有可徵者祭祀之謂也宜具歲月于石元禮謹惟聖人之道與天地並行有天下國家者所當崇重春秋脩事祖庭累朝之盛舉也今我儲皇仁孝之誠昭假上下雖金輅行在六師駐嚴而脩明典禮不廢俎豆之事其尊崇聖教增輝昭代示人心以爲治之本宏規遠略猗歟盛哉是可書也若曰底定我家仰祈鴻休基圖永命祚于無窮神之相之厥惟伯矣是重可書

也拜手稽首謹爲之記

至正二十五年二月吉日承德郎樞密院經歷  
賜進士及第魏元禮撰



